

Éxodo

Moisésuunoa Cununi Cuscan

Israelifo Egipto anoashu omitsiscani cuscan

1 ¹Ascan nan nocofunu Jacob ahuun anu futsa Israel ahuun facufo non aton yorafoya Egipto ano fonifo. Ahuun facufoan ato anufo un mato yoipacunon. ²Futsan Rubén non Simeón non Leví non Judá non ³Isacar non Zabulón non Benjamín non ⁴Dan non Neftalí non Gad non Aser. ⁵Nantifi Jacob ahuun funafo setenta a fu Egipto mai ano fonifo. Egipto ano nocoataima ahuun facu futsan ahuun anu José, nannoshon ato manani.

⁶Ascano José, yafi ahuun ochifo non ahuun ushori nantifi ahuun caifo a fu iyopaonifo nantifi nai futsunifo.

⁷Ascafiani aton funafo ichaparasi cainnifo. Egipto mai anoafu Israelifo ichapacoin ipaonifo.

⁸Ascan chipo Egipcio niaifo futsan. José Egipciofo shara huapaoni cuscacai nan niaifo futsan anori shinannima.

⁹Ascashon ahuun caifo yoini isca huaquin, —Ua nica sharacahuun. Nan Israelifo fasi ichapacoin caianfo. Ascaracai sharama. Noco finontiro. Fasi musucoin. ¹⁰Non natian shinanon ahuuscashomain non ato finontiroquin. Non ato finonyamaino noco chaca huatirofo. Nan noicasmaifoan aton

ranushumuafoan noco rutuaifoanno nan Israelifoan ato futan noco rutufaini nocon mai anoashu fotiroforan, —ishon niaifoan ato yoini.

¹¹Nannori niaifo ato yoiton nicacatan Egipciofoan Israelifo yononi aton yonomatifo inon. Ascashon ato curushcain yonomanifo. Pitón mai anoafu Ramsés mai ano pushu rasi ato huashononfo. Nan pushu rasifo ano Egipciofoan ato tushufo mucushonifo.

¹²⁻¹³Egipciofoan ato curushcain yonomaitian nan shafatifi Israelifoan aton facufo ichapa rasi cainifoanno. Ascano Egipciofo atoqui musunifo. Ascashon curushcaincoin ato yononifo.

¹⁴Nan ladrillofo mai yafi foi osia ato oni huashofain aton mau ano ato curushcain yonomanifo. Ascano fasi omitsiscanifo.

¹⁵Nan Israelifo aton anu futsa Hebreofo. Nan Hebreo ainfo rafu aton anu Sifra yafi Fúa. Nan rafutan aton caifo ainfofo aton facu cainyaintian ato cushushonifo. Ascashon nantia Egipcio niaifoan nan ainfo rafu yononi isca huaquin,

¹⁶—Maton caifo Hebreo ainfofo aton facufo cainyaintian man ato cushutiro shotocofacu caianshu nitiro. Ascan furonanfacu caincun ato rutucahuun, —ishon niaifoan ato yononi.

¹⁷Nannori ato yoifia nan rafutan Upa Diosi icoinra huacashon ahuun tsain

fusti tanasharacoincashion. Ato niaifohan yonoo cuscacai anori shinanpainifoma. Tsoancai furonanfacu caincun rutupainifoma ninonfo ishon. ¹⁸Nan niaifohan nicaitian ato cunani yocashquin.

—Un mato yonoo cuscan man huama. ¿Ahuuscai man furonanfacufo man rutuamamun nanonfo? —ishon niaifohan ato yocani.

¹⁹Ascashion nan ainfo rafutan niaifo cumani, —Niaifon, Faraón, nan Hebreo ainfofocai min caifo ainfofo cuscarafoma. Nocon caifo ainfofoan fasi curushcain yonomisifo. Ascan non atoqui nocoataima aton facufo cainriscaniran, —ishon Sifra futan Fúa nannori niaifo yoinifo.

²⁰Nannori yoiiafotian Diosin ato shara huani. Ascano aton caifofo Israelifo paratama cainnifo. ²¹Aton caifofo facu cainyaintian aton cushumisifo Sifra yafi Fúa Diosi icoinra huafoan Diosin shara huaquin atorifi facu inan arifi facuyanonfo. ²²Ascashion Egipciofoan aton niaifohan Faraón nantifi ahuun caifofo ato yononi isca huaquin, —Hebreofo aton facu furonanfacufo rama cainyaifo ato unu Nilo muran potacahuun asanonfo. Ascan shotocofacufo unu muran potayamacahuun ninonfo, —ishon ato niaifo Faraón yononi.

Moisés cainni cuscan

2 ¹⁻²Ascatan nantia Hebreo nocofunu futsan ainfo fiini. Nan rafu Leví ahuun funafo ini. Ascano chipo facu nanuni. Ascashu furonanfacu cainni. Ahuinin ahuun facu oian fasi sharashtacoin ini. Ascashion oshu rafu non fusti onuyoni Egipciofoan rutunonfoma. ³Ascano oshu rafu non fusti finoannocai tsoan afanan onutiro inima. Ascatan shihuati ocumuran

nafuqui shara huashon aqui foin raishani unu iquinonma. Ascashion nan muran ahuun facu ratani. Ascatan unu Nilo cusumunri nushachifo muran notani. ⁴Ascano nan facushtan ahuun chipi nanno chaimashta nishon oinni ahuuscaratiroran ishon oinshquin.

⁵Ascano nantian nan niaifo Faraón ahuun facu shomaya unu Nilo ano nashi focani fonifo. Ahuun yonomatiferi nan unu cusumunri cahuacacaini. Ascashion Faraón facu shomayaton shihuati nushachifo murannoo fuchishon ahuun yonomati yononi nan shihuati fiishon inanon. Shihuati nonoo fuchishofin, —iOincapon! Oa shihuati nonoo. Ua fishotahuun. Un a muran oinon. Ahuuamain a muranquin, —ishon Faraón facu shomayaton ahuun oinmati yononi. ⁶Ascatan shihuati fupacufoanquin facu uaiquin ian ian icaiton fuchini. Fuchiashu fasi ahuun ramapaicoinni.

Ascashion yoini isca huaquin, —Naafin Hebreo facushtaquin. Un shinanracafin Hebreo ahuanfoan ahuun facu onuaquin tsoan fuchinonma, —ishon Faraón facu shomayaton nannori yoini.

⁷Ascano nantian facushta ahuun chipin nishon nicani yoiquin isca huaiton,

—¿Un Hebreo ainfo futsan mia ihuishotitromun na facu shoma amanon? —ishon yoiaiton.

⁸—Ai. Ua ihuishotahuun, —ishon yoini.

Ascashion nan ainfo shotocofacu caashon facu ahucain ihuushoni shoma amanon. ⁹Ascano nan niaifohan Faraón facu shomayaton nan facushta ahuun ahua yoini isca huaquin,

—Na facushta fiipun ua pushcoshoshquin. Nan min shoma amai cusca un mia ahuun rafanan pui

inannon, —ishon Faraón facu shomayaton facushtan ahua yoini.

Ascanshon facushta ahuan iyoní.

¹⁰Ascano nan facu pishtamano ahuan afanan Faraón facu shomaya inanni.

—Naafin uhuun facu cuscaran iquiquin,

—ishon Faraón facu shomayaton yoini.

Ascano nantian anuni Moisésran huani.

—Unfin shihuati murannoa unu

cusumunnoa fuchishon nushfiaquin.

Ascashofin un anuquin Moisésran

huaicai, —ishon yoini.

Moisés Egipto anoashu ichoni

¹¹Ascano nan Moisés pushcoaitian ahuun caifo oincái caní. Ascatan nocoshon oian Egipciofoan ahuun caifo Hebreofo fasi curushcain ato yonomani.

Ascato ano nocoshon oian Egipcio nocofunún ahuun caifo sutuaiton oinquín.

¹²Ifiacuahuan oian acachori

tsoa yamai ini. Nan ahuun caifo

sutuaiton oinquín Moisés nocofunu

Egipcio rutuní. Rutushon mainfin mai

huani. ¹³Ascano iyoconaino oian ahuun

caifo Israelifo aton anu futsa Hebreofo

sutunainfoan fuchini. Ascashon nan

futsan futsa chaca huashon yoini isca

huaquin,

—¿Ahuuscai min yora min sutuimun?

Manfin yora iquinan tananfiashu man

sutunainquin, —ishon ato yoiaiton.

¹⁴—¿Tsoan mia yonoamun min nocon

niaifo inon? ¿Min noco yonotiromun

non ahua atiro iyamarai non atiroma?

Ascashon min noco numapai. ¿Nan min

Egipcio rutufaita cuscari huaquin mian

rutuimun? —ishon yoiaiton nicain

Moisés fasi raturiscatani.

—Un Egipcio rutufaitamun man

nantifiton tapiafo, —ishon Moisés

shinanni. ¹⁵Ascano nan Moisés Egipcio

rutuita tapishon Faraón ahuun

ranushumuafo nichini Moisés funanonfo

fuchishon rutushquin. Nan nicatanaitian

Moisés ichoni. Ratucaini cai. Mai futsa ahuun anu Madián ari tsoa istaipama pashaicani. Nanri pozomua chaima tsaoni.

¹⁶Ascano nan mai Madián ano

nocofunu ahuun anu Reuel. Nantofin

ahuun caifo Upa Diosi cufinshomisi ini.

Ahuun facu shomaya mucu fustiti non

mucu foshca fu rafuati ini. Naan

shomayafo unu fii focani fonifo apan

chashoanfo ayamashcaquin. Ascano nan

pozomua ano Moisés tsaoa ini.

¹⁷Ascatan nantiari chashoan

cushumisifoan shomayafo ato ichonnifo.

Ascaiton oin Moisés funinacahuan ato

yoini, —¿Ahuuscai man shomayafo

ichonhuain? Nanfoanfin chashohuan

ayamatirofoquin, —ishon Moisés ato

yoini. Ascashon Moisés afincoin nan

chashoanfo ato unu ayamani. ¹⁸Nan

samamashtacoin shomayafo aton apa

Reuel ano nasofainifo. Nocoifoan aton

apan yocani,

—¿Ahuuscai man nasoriscamun?

—ishon ato apan yocaiton.

¹⁹Nan shomayafoan apa cumanifo,

—Upa, nocofunún Egipciofin noco

numaquin. Nan chashoan cushumisifoan

noco asca huaifoan nan nocofunún noco

numashon. Nanton nocon chashoanfo

ayamanaran, —ishon apa yoinifo.

²⁰Ascashon nannori huaifoan apan ato

yoini,

—¿Ranimun nan nocofunu?

¿Ahuuscai man nichifuranamun?

Ihuitacahuun piyonon, —ishon aton

apan yononi.

²¹Ascashon Reuel Moisés yoini,

—Uhuun pushu muran iquiyohuu,

—ishon yoini. Ascano Moisés Reuel

pushu ano a fu ini. Ascano chipo Reuel

Moisés yoini,

—Uhuun facu un mia fiimanon,

—ishon Reuel Moisés yoini. Ascashon

ainfacu Séfora fiimani Moisés ahuun

ahuin inon. ²²Ascano nantianri facu nanuni. Ascashu furonanfacu cainni. Cainyaintian Moisés yoini isca huaquin, —Nunocai uhuun maima. Un yora futsafo aton mai ano ica. Ascashofin uhuun facushta un anuquin Gersonran huaicai, —ishon Moisés yoini.

²³Ascano fari ichapa finoanno nan Egipciofoan aton niaifo Faraón naani. Nantianri Egipciofoan Israelifo ato omitsisca huaquin curushcain cashmancoin yonomapaoni. Nan Israelifoan ato omitsisca huaifoanno uaicaifoan Diosin ato nicaquin ato shinancoinni. ²⁴⁻²⁵Israelifo fasi pashapai piniaifo cusca Upa Diosin ato nicaquin nan Abraham non Isaac non Jacob yoiyoni cusca Upa Diosin shinanriscatani, —Unfin mato funafo shara huapacunacaran, —ishon ato yoiyoni cusca Diosin nan Israelifohuun ramapaicoquin ato shinanni.

Diosin Moisés cunani cuscan

3 ¹Ascano nantian Moisés ahuun raisi Jetro ahuun caifohuunshon Diosi cufinmisiton ahuun chashoanfo cushushopaoni. Fasi chaicoincushon tsoa istaipama ano ahuun raisin chashoanfo iyon. Nanno machi cuyacoin Diospan ahuun machiran ishon anumisifo. Ahuun anu futsari Horeb huanifo. ²Nannoashu Diospan oinmati nan a fu nai muran ica Moisésqui noconi. Tsoa futsa yamafaianno ahuun oi Moisés nicani. Nan nii cuyamamishti shocoa chi uruai murannoa Diosin oinmatin Moisés oinmani. Nantian Moisés oinni nan nii cuyamamishti chi urufiainocai coonima. Nan uru shahuashahuaifiaquicai ahuun puifo coanima. ³Nantian Moisés ahuun nomuran shinanriscatani. —¿Ahuuscai nii cuyamamishti shocoa cooimamun? Un chaimashta canon oinsharashquin

ahuuscashumain nii puifo cooimacain. Tsoancai iscara oinyomisima. ¿Ahuuscaimun nii cuyamamishti shocoa chii urufiaino ahuun puifo cooimacain? Un oincanon, —ishon Moisés ahuun nomuran shinanni.

⁴Ascashu Moisés nan nii cuyamamishti shocoa chaimashta cani oinshquin. Ascano samamashta Moisés nan chii uruai murannoa Diosin ahuun oi nicani yoiquin isca huaiton, —Moisés, Moisés, —huaiton. —Unquian. Un nuno, —ishon Moisés cumani.

⁵—Nanno nitunhuun. Afanan nii cuyamamishti shocoa chaimashta oyamahuu. Unfin nunoquin. Mincai ua cuscara sharama. Ascacun min sapato pucahuu un mia yoinon.

⁶Nan min shunifo Abraham non Isaac non Jacob un aton Diosifin Unquin, —ishon yoini.

Nannori huaiton nicain Moisés fasi ratucoinqin shinanni isca huaquin, —Un Diospan fuso oin un nariscatiroran, —icashu fufopomuni Diospan fuso oinshquima. ⁷Ascano Diosin afanan yoini isca huaquin, —Uhuun yora Israelifofin mun oianquin fasi omitsiscaifoan Egipciofoan ato curushcain yonomanai cusca fasi atsanai pashapaiyaifoan un oian. Un fasi atohuun ramapaicoian. ⁸Unfin nai murannoashu fotoaquin ato numashquin. Unfin Egipcio mai anoshon ato nichicain nan mai uhuapa fasi sharacoin ano un ato iyoí cai. Nannofin nantifi yono foaisharacain tushu sharacoinfo futsa futsatapafa icain fona ichaparashquin. Nan unu afatiro cusca nanscarifi ai nan fona ayati sharacoin afain. Nantianri nanno Cananeofon non Hititafo non Amorreofo non Ferezeofon non Heveofon non Jebuseofon non afo icafoquin. ⁹Min caifo

Israelifo uacaifo cusca mun nica. Egipciofoan ato fasi chaca huai cusca mun oian. ¹⁰Natian ato ari catahuun. Un mia Egipciofoan aton niaifo Faraonqui mia nichu uhuun yorafo nan Israelifo Egipcio mai anoshon min ato iyotanon, —ishon Diosin Moisés yoini.

¹¹Nannori Diosin yoiaiton nicain Moisés Upa Diosi cumaquin isca huani, —Ma. Uncai ahuama. Un Faraón icano uhuun caifo Israelifo Egipcio mai anoshon un ato iyotapanan, —ishon Moisés Upa Dios cumaiton.

¹²—Unfin mi fu ishquicai. Min caifo Israelifo Egipcio mai anoshon iyoaitian nan machi Horeb anoshon man ua cufinshquinon. Ascashon min tapitiro un mia ya min yorafo nan Israelifo ano nichiaran, —ishon yoiaiton.

¹³Ascaiton Moisés cumani, —iMa! Uncai ascapaima. Uhuun caifoan, “Min chaniran,” ishon ua yoitirofo. Ascafin unfin uhuun caifo Israelifo ano nocoshon un ato yoitiroquin isca huaquin,

“Nocon shunifoan aton Diosifin ua matoqui nichiaquin,” ishon un ato yoiaiton ua isca huatirofo,

“¿Nan Diosimun ahuun anu ahuanuquin?” ishon. ¿Ua yocaifoan un raquiri ato cumatiromun? —ishon Moisés cumaiton.

¹⁴—Ma. Unfin ipatianiquin. Ascacun ato yoitahuun isca huaquin,

“Nan ahuun anufin Ipamisiquin,” ishon ua matoqui nichiaran ato huahuun. “Diosin ahuun anu futsafin Uncoinquin,” ishon nannori ato yoitahuun, —Upa Diosin Moisés yoini.

¹⁵Afanan Diosin Moisés yoini isca huaquin,

—Min caifofo Israelifo yoitianhuun isca huaquin, “Nocon shunifo Abraham non Isaac non Jacob nocon shunifoan aton Diosin nan nocon Ifoanfin ua

matoqui nichiaquin,” ishon ato yoitianhuun. Nan un mia yoiia cuscafin Un ipamisiquin. Nan uhuun anu. Min non min caifo non maton funafo tapitiro uhuun anucaí fiananpacunacama. Unfin ipamisiquin. Nannori fusti uhuun anu.

¹⁶Ascacun natian min catiro min caifo aton niaifofo ichanan huahuu. Nan un mia yoiia cusca un ato tapimanon. Ato yoitahuun isca huaquin,

“Nocon Ifo Diosifin Abraham non Isaac non Jacob nan nocon shunifoan aton Diosiquin. Arus fustifin ua oinmanaquin. Ascashon ua yoiquin isca hua,

“Un min caifo Israelifo oian Egipciofoan ato fasi omitsisca huaiton.

¹⁷Nan min shunifo inonpacoai cusca un yoiyoni nan omitsiscaifotian un mato Egipcio mai anoshon mai futsa yora futsafo nanno icafo ari un ato iyoi cairan huani. Nan maifin Cananeofo non Hititafo non Amorreofo non Ferezeofo non Heveofo non Jebuseofo nan mai ano icafo. Nanno mai fasi sharacoin. Nanno yonofo foaisharacain tushu sharacoin futsa futsatapafo icain fona ichapa fata sharaforan,” ishon yoini.

¹⁸Min caifo Israelifoan aton niaifofoan mia nicatirofo. Nan mia nicaifoanno ato fu nan Egipciofo aton niaifocoin ano man catiro uhuun tsain yoishquin. Yoiquin isca huahuu,

“Nonfin Hebreofoquin. Nocon Ifo Diosin no fu ica. Ascacun noco nichipun non nunoashu osha rafu non fusti non tsoa istaipama ano catanon. Nannoshon nocon Ifo Diosin non inafo rutushon non ahuun tsain nicayanan non ismasharanon,” ishon nannori yoitacahuun.

¹⁹Munfin tapian un Egipcio niaifo uhuun curushu ismayamainocai mato nichicaima. ²⁰Nan un ahumamishiti

huai cuscan un ato oinmashquicai.
Ascaiton oin uhuunnoashu nan aa non
ahuun yorafo omitsiscaifo cuscan. Un
ahuun caifofo namashquiai cusca
oinquin aton niaifoan mato nichishquin.

²¹Unfin Egipciofo matohuunoa
shinanmasharashquicain. Ascano aton
niaifoan ahuun mai arishon mato
nichiaitian ahuun yorafoan mato ahua
sharafo inanshquin man fotonon.

²²Ascano nantianri Israeli ainfofoan
Egipcio ainfofo chaima icafo iyamarai
nan aton pushu muran icafoan aton pui
nan oro non cuno sapa facafacaitsa non
sahuutifo Israeli ainfofoan ato
yocaiotian. Nan sahuuti mato
inainfotian maton furonanfacufo yafi
mato shotocofacufo man ato
sahuumashquin. Man nansca huaquifin
man ahuafo fitiroquin. Nan
matohuunoashucaí Egipciofo afanan
ahuaariyaimaran, —ishon Diosin yoini.

4 ¹Ascano Moisés afanan Diosi
cumani isca huaquin,

—Uncai ahuama. Uhuun
caifofoanra ua icoinra huatiroma.
Uhuun tsain nicapaitamarocon ua
yoiquin isca huatirofo,

“Nocon Ifo Diosincai mia
onanmanama. Mincai Diosi
onanmisimaran,” ishon ua yoitirofo,
—Moisés nannori Diosi cumaiton.

²—¿Minmun ahua tsomaquin? —ishon
nocon Ifon Diosin Moisés yocaiton.

—Uhuun poquitiran, —ishon cumani.

³—Ascaiton min poquiti mai ano
potahuu, —ishon nocon Ifo Diosin
Moisés yonoai cuscan. Ahuun poquiti
potaino samamashta rono oniriscatani.
Ascatapiayaino Moisés mustairitani.
Rono omisi shucucaini. ⁴Ascaiton

oinquin nocon Ifo Diosin Moisés yoini,
—Ahuun inan yatahuun, —huaiton.
Moisés ahuun inaquirishon yataino
afanan ahuun poquiticoín oniriscatani.

⁵—Nan min chipo ato iscara ismaitian
unquian nan mato Ifo Diosin maton
shunifoan aton Ifo nan un mia
nichiaitian chipo mia icoinra huashcani.
Nan maton shunifo Abraham non Isaac
non Jacob nanfoan un aton Diosin.
Nanscacun nan un miqui nocoaiton mia
icoínra huashcani, —ishon nocon Ifo
Diosin yoini. ⁶Ascashon afanan yoini,
—Natian min mucu man camisa
shochiquirinoá muran muihuu, —ishon
Diosin Moisés yoini.

Nan yoiái cusca huani. Ascatan
afanan ahuun camisa shochiquirinoá
murannoa mucu tsuca furaquin oian
ahuun mucu oshocoin nan yoa rama
furoamua ointsa ini. Nan pau ahuun
anu lepra fuchiacucahuani. ⁷Ascano
Diosin afanan Moisés yoini isca
huaquin,

—Min mucu man afanan min sahuuti
muran muihuu, —ishon yoini.

Muitan ahuun mucu tsucafuraquin
oian ahuun mucucai afanan lepra yamai
ini. Nan ahuun caya cuscara muma
sharacoin ini. ⁸Ascano afanan nocon Ifo
Diosin Moisés yoini isca huaquin,

—Min tsoan atiroma cusca tau
huaquin ato ismaiton mia icoinra
huayamaifoan min afananri tsoan
atiroma cusca ato ismatiro. Min ato
nanscara ismaino mia icoinra
huatiroforaca. ⁹Ascafia nan rafu min ato
ismaiton mia icoinra huayamafain mia
nicacasmaifoan unu Nilo fuahuu nan
mai mutoano ocashquin. Min asca
huaino nan unu fianananriscatan
imicoín oniriscatanon, —ishon nocon
Ifo Diosin Moisés yoini.

¹⁰—¡Ohua, Ifon! Uncai tsain
sharatiroma. Unfin atiatitsaquin. Un
facuashu nanscara un inacahuana. Uhuun
tsaincai niaífo tsain cuscarama. Tsoancai
ahuun tsain ua nicananpaitiroma. Uhuun
tsaincai sharamafinquin. Unfin

funainquimashta fusti tsaintiroquin. Un min oinmatifiashocai un yorafo ichanaintian cayacafi yoisharatiromaran, —ishon yoini.

¹¹Afanan nocon Ifo Diosin Moisés yoini,

—Unfin yorafoan aton ashfa onihuaquin tsaintirofoma oni huafain cupucutiofoma oni huafain un nantifi yorafo oni hua. Un nan atirifi oimsharafain fushofori un oni huani. Unfin min Ifoquin. Nan un yora oni huapayai cuscarafokin un ato onihuaquin. ¹²Ascacun natian catahuun un mia yoia cusca huahuu. Nan min ato yoiatian un mia tapimashquiran, —ishon nocon Ifo Diosin Moisés yoiatton.

¹³Ascatan afanan Moisés cumani isca huaquin,

—Ifon, yora futsa nichipun nan min yoiat cuscan mia ashonon, —huaiton.

¹⁴Nannori cumaiton nicain nocon Ifo Diosin Moisésqui sinataquin yoini isca huaquin,

—Nan min ochi Aarón mia cuscara arifi Levitafo. Nantoncaifin tsain yoisharatiroquin. Natian man mia oinyoi. Miqui nocoaitian fasi unimacoinni mia oiainno. ¹⁵Nan un mia yoiat cusca min ochi tapimahuu. Nanton mia yorafo yoishonon. Un mato yonomapayai cusca un mato tapimashquin. ¹⁶Min ochi mihuunoa mato yorafo yoishquin. Min tsain cuscararishon ato yoisharatiro. Nan min ochifin ua cuscaran min Diosin yoi cafisca huaiquin. ¹⁷Natian min poquitiya catahuun un mia yonoai cusca huaquin min poquitihuunshon min ahuamamishti yoran atiroma cusca huaquin min yorafo ismashquiran, —ishon nocon Ifo Diosin Moisés yoini.

Moisés afanan Egipto ano nasoni

¹⁸Ascano Moisés afanan ahuun raisi Jetro ahuun pushu ano nasoni.

Ascashon ahuun raisi yoiquin isca huani,

—Anifon, un Egipto ano capaica. Ua nichipun. Uhuun caifo un afanan ointanon atirifimain man naafoquin, —ishon Moisés yoiatton.

—Shara. Minfin catiroquin.

Casharatahuun. Min atoqui noco sharapainonran, —ishon ahuun raisi Jetro cumani.

¹⁹Moisés ahuun raisi pushu anoashu cataima nocon Ifo Diosin yoini isca huaquin,

—Nan Egipcio anofoan mia rutupainifo nanfo nantifi man nai cuyonifo. Ascacun ratuquima Egipcio mai ano nasohuun, —ishon nocon Ifo Diosin Moisés yoini.

²⁰Nannori yoiatton nicaquin Moisés ahuun ahuin non furun rafu burro camaqui ato iyoni Egipcio mai ano ato fu iishquin. Diosin nan ahuun poquitihuunshon tsoan atiroma cusca huashoita cusca nan Moisés ahuun poquiti tsomani. ²¹Ascano afanan nocon Ifo Diosin Moisés yoini isca huaquin,

—Minfin uhuunshon ahuamamishti huatiroquin. Ascano nan min Egipcio mai ano nocoaitian niaifo Faraón ano catahuun min uhuunshon ahuamamishti huatiro cusca ismashquin. Ascafia unfin Faraón ahuun nomuran shinanmanicai min yorafo ato nichinonma. ²²Nantian mato nichiyamaiton afanan Faraón yoihuu isca huaquin,

“Nocon Ifo Diosin mia yoi isca huaquin, ‘Israelifofin uhuun facu iyoa cuscarafokin. ²³Un mia yonoicai uhuun facufo min mai arishon ato nichihuun ua cufinonfo. Nan ua noicoiainfoan ua nicasharai cuscan ua ismanonfo. Nannori un mia yonofiaiton mian nicacasma. Nanfofin uhuun facu cuscarafokin. Min ato nichicasmai mia anoashu fononfoma. Ascacun chipo un

min furun iyoa un namashquiran,’”
—ishon Diosin Faraón yoini.

²⁴Nantian Moisés non ahuin non ahuun facu rafuya mai futsa ano nocoashu nanno oshani. Nannoashu nocon Ifo Diosin afanan Moisésqui noconi nannoshon Upa Diosin Moisés nama cuani. ²⁵⁻²⁶Ascano nannoshon Moisés ahuinin ahuun anu Séfora cunoti cuscaran toquiri pasnan cunocoin fiini. Ascashon ahuun facun ahuun foshqui rupa shatuni. Ascatan ahuun ahuinin ahuun funu Moisés tau naman potani. Ascashon ahuinin yoini isca huaquin,

—Minfin uhuun funu. Un mi fu fianaintiancai un tapinima nocon facu un ahuun foshqui rupa shatushquiai cusca imi fonon, —ishon nannori yoini. Nan ahuinin furun foshqui rupa shatuaiteon oinquicain nocon Ifo Diosin Moisés namanima.

²⁷Ascano nantianri nocon Ifo Diosin Aarón yoini isca huaquin,

—Min ushto Moisés tsoa istaipama miqui oiquin aqui nocotahuun, —ishon Diosin Aarón yononi. Ascano nan machi anumisifo Diosin ahuun machiran, huamisifoanno. Nanno Moisésqui Aarón noconi. Nocotan fasi chipocuquin unimacoinquin ahuun tamoqui tsoani.

²⁸Ascashon nocon Ifo Diosin yoini cusca Moisés nantifi ahuun ochi Aarón tapimani. Yoiquin isca huani,

—Ochin, nocon Ifo Diosin ua yoia isca huaquin,

“Un mia tapimai cusca uhuunshon tsoan atiroma cusca ato ismahuu,” ua huaran, —ishon Moisés iyoa Aarón tapimani. ²⁹Ascano nantian nan rafutan aton caifo Israelifo aton niaifofo ichanan huashon ato yoinifo. ³⁰Nan nocon Ifo Diosin Moisés nantifi yoini cusca Aarón ato tapimani. Nantianri Diosihuunshon tsoa atiroma cusca Aarón ato ismani.

³¹Nan oincashon icoinracoin huanifo. Ahuun ushto Moisés Dioshuunshon yoini cusca Aarón ahuun caifo nan Israelifo tapimani.

—Nocon Ifo Diosin mato fasi shinain. Man omitsiscasai cusca nantifi man oian Diosin matohuun ramapairan, —ishon Aarón ato yoini. Ascaiteon nicacashon nantian Diosi cufinnifo. Yoiquin isca huanifo,

—Upa Diosin, minfin nocon Ifo sharaquin, —huanifo. Ascashon nantifiton ratoconun mai chachishon Diosihuunua yoisharanifo.

Moisés fu Aarón nan niaifo Faraón fu yoinonannifo cuscan

5 ¹Ascatan Israeli niaifofo ato tsain yoiquin anaititan Moisés fu Aarón nan Egipcio niaifo Faraón ano tapimani focani fonifo.

Ascashon Faraón ano nocotan yoiquin isca huanifo,

—Niaifon, non mia tapimanon nocon Ifo Diosin mia yoipaiyai cuscan, “Uhuun yora nan Israelifo tsoa istaipama ari nichihuun. Nanno ichanancashon pifain uhuunua yoisharanonfo,” ishon nocon Ifon Diosin mia yoiran, —ishon Moisés futan Aarón yoiaifoan.

²—¿Tsoamun nan maton Ifo Diosiquin ua yononon un maton caifo yafi mato nichinon? Uncai maton Diosi tapiama tsoanmainquin. Ascacun uncái nan min caifo Israelifo nichima, —ishon Faraón ato cumani.

³Ascashon Moisés futan Aarón afanan Faraón yoini,

—Nonfin Hebreofo nocon Diosin nocoqui noco noco yoinon. Ascan non nunoashu tsoa istaipama ano capai. Osha rafu non fusti non ari nocotiro. Nannoshon nocon Ifo Diosi inafu rutushon non tanasharai cusca non ismanon. Non nocon Ifo Diosin

tanansharayamaiton noco onaintimatiro. Pau chacacoinfo fuchimayamaraqui yora futsafoan ato ashin noco rutunonfo. Ascacun noco nichipun, —ishon yoiaifoan.

⁴⁻⁵—Mancai ahuamafinquin.

¿Ahuuscai maton yorafo man shinanchacamanimun? Man asca huaquifin maton yora ichapafo man ato yono shatumanicain. Ascacun mato yono ari fotacahuun, —ishon niaifo Faraón ato tsain curushcain yoini.

⁶Nan shafatari Faraón Israelifo aton niaifofo yononi isca huaquin,

⁷—Afanan Israelifo shachi cuscara inanyamacahuun aton ladrillofo afin onihuanonfo. Nanfoanfin aafin shachi funatirofoquin. ⁸Ascafia nan oni huamisifo cusca ladrillo nanticoin onihuatirofo. Nan Israelifofin shanicoinfoquin. Nanscashion ua yoiafo,

“Noco nichipun nocon Ifo Diosi inafu rutushon noco yononi cusca non ashonon,” ishon ua yoiafo. ⁹Ascacun natian ato curushcain yonomacahuun afanan Moisés futan Aarón aton chani icoindra huanonfoma, —ishon Faraón niaifo patasharinoafu yononi.

¹⁰Nannori Faraón ato yoiaiton nicacatan nan niaifo patasharinoafu Israelifo yoiquin isca huanifo,

—Nocon niaifo Faraón mato yoi isca huaquin,

“Noncai afanan mato shachifo inainma. ¹¹Natian mafin funacahuun raniamain man fitiroquin. Ascafia man ladrillofo shafatifi oni huamisi cusca natiari nansca huacahuun,” ishon Faraón mato yoiaran, —ishon ato tapimanifo.

¹²Nannori nicacatan Israelifoan nantifinfain Egipcio mai anoashu shachi funai fonifo. ¹³Nan shafatishon aton Egipcio niaifofoan Israelifo yononi, —Nan man ladrillo oni huataima non

mato shachi inanmisi. Noncai afanan mato shachi inainma. Ascafia nan man amisi cuscan ladrillo oni huacahuun, —ishon ato curushcai yononifo.

¹⁴Ascano nan Egipcio niaifo patasharinoafu Israelifo yonoshomisifo aton niaifofo coshanifo,

—¿Ahuuscaquimun maton yorafoan nan amisifo cusca ladrillofo oni huatama? Na shafatacai man oni huamisi man oni huamaquin, —ishon ato yoinifo.

¹⁵Ascano Israelifo aton niaifofo Faraón ano fonifo tapimai focani.

—Niaifon Faraón, nonfin min yonomatifoquin. ¿Ahuuscaimun min noco asca huaquin? ¹⁶Man noco shachi inanyamafishon, “¡Ladrillo ichapa onihuacahuu!” man noco huaquin. Noco coshamisifofiacai nocohuun nuama. Man noco shachi inainma. Min yorafuhoonfin atohuun nuaquin, —ishon Israelifoan Faraón tapimanifo.

¹⁷Nannori yoiaifo nicaquin Faraón ato cumani isca huaquin,

—Manfin shanicoinfoquin. Icon, man shanishunifo. Ascacun,

“Noco nichihuun nocon Ifo Diosi non ina rutushononran,” ua man huafafainni.

¹⁸Natian foashu afanan yonotacahuun. Noncai afanan mato shachi inainma. A man ladrillo oni huamisi nanticoinri oni huatacahuun, —ishon niaifo Faraón ato nannori yononi.

¹⁹Ascano nantian Israelifoan shinannifo isca huaquin, —Nan niaifo Faraón noco yonoa non ladrillo ichapa oni huanon. Ascafia noco shachi inainma non ladrillo oni huapanan. ¡Ohua! ¿Nonmun ahuuscacatiroquin? —ishon shinannifo. ²⁰Nan Faraón pushu anoashu focani Moisés futan Aarón ato chifishon manaifoanno noconifo.

²¹Ascashion Israelifo niaifofoan ato yoiquin isca huanifo,

—Ascacun nan niaifo Faraón nocoahuuoa shinanchaca. Ahuun yorafoanfin nocoahuuonari shinanchacaniquin. Matohuunfin nuaquin. Natian noco rutupaiquifin noco rututirofoquin. Diosimain mato onaintimapainonran, —ishon niaifofoan Moisés yafi Aarón yoinifo.

Moisés Upa Diosi cufini cuscan

²²Moisés nan nicatan nocon Ifo Diosi cufinquin isca huani,

—¡Ai timafin, Ifon! ¿Ahuuscaqui min uhuun caifo omitsiscamaimun? ¿Min ato omitsiscamafishquin ahuuscaimun mian atoqui nichiaquin? ²³Un nan min anuhuunshon niaifo Faraón yoiquin tau huaitian natianri uhuun yorafo omitsiscacani. Mian yoia cuscaai min aama. Min yora Israelifo min numamaran, —ishon Moisés nannori Upa Diosi cufini.

Diosin Moisés yoiyoni cuscan Israelifo mai futsa ari nichishquiai cuscan

6 ¹Ascano afanan nocon Ifo Diosin Moisés cumani isca huaquin,

—Un Faraón onaintimai cusca min natian oincai. Uhuun curushhuunshon Faraón min yorafo Egipcio mai anoshon nichishquin.

²Ufin maton Ifoquin. ³Min shunifo nan Abraham non Isaac non Jacob unfin uhuuoa ato tapimaniquin. Unfin maton Diosiquin. Un ahuamamishti huatiro. Un ato oinmanai cusca chipo man oin. Ascfaiacai un ato uhuun anuhuuo Faraón Iforan ishon un ato tapimanataima. ⁴Un ato yoiyoni cusca un ato nan mai futsa ahuun anu Canaán ano un ato inanshquin. Nan mai ano Canaánfo iyopaonifiacai afocai maton shunifoan aton caifoma. ⁵Natian nan Israelifo omitsiscaiton mun nican. Egipciofoan ato yonoa aton

yonomamisifo inonfo. Fasi ato chaca huafafaincani. Ascacun unfin Abraham non Isaac non Jacob non afo yoiyoni cusca mun natian shinain. Uncai ointiaquimanama. Nan un ato yoipaoni cusca un aton funafo nan Israelifo mai futsa shara ari inonfo un ato nichishquin. ⁶Ascacun min caifo Israelifo ua ato yoishohuun isca huaquin,

“Unquian mato Ifo Diosin. Unfin Egipciofo uhuun yono ismaicai. Un ahuamamishti huatiro cuscafin man oincain. Nantiancai afanan man curushcai yonoima. Afananricai tsoa aton yonomatifo iquima. Unfin mato numaicai. Ascashon Egipciofo un ato onaintimacoin uhuun curushhuunshon man ato mai anoshon un mato nichishquin. ⁷Ascacun manfin uhuun yorafo iquincain. Unfin maton Diosiquin. Ascashofin un mato Egipcio mai anoshon nichishquicain afanan mato curushcain yonononfoma. Ascacun natian man tapitiro un maton Ifo Diosin. ⁸Nan Egipciofoan mai anoshon un mato mai futsa shara ano iyoshquin. Un maton shunifo Abraham non Isaac non Jacob yoiyoni cusca un mato nan mai shara inain matona inon. Unfin mato Ifocoinquin,” —ishon nocon Ifo Diosin yoini.

⁹Ascano Moisés ahuun caifo Israelifo Diosin yoini cusca ato tapimani. Nannori ato yoiaiton nicacatancai tsoan Moisés icoira huapainima. Nan Egipciofoan ato curushcain yonomamisifia nantian fasi aton nomuran fucashcoin muutanifo tsoancai Moisés yoiiai cusca nicapainima. ¹⁰Ascaiton nocon Ifo Diosin Moisés yoini isca huaquin,

¹¹—Egipciofoan aton niaifo Faraón yoitahuun isca huaquin,

“Uhuun caifo Israelifo min mai anoshon machi ari nichihuun,” ishon

Faraón yoitahuun, —ishon Diosin Moisés yoini.

¹²Nannori nicatan Moisés nocon Ifo Diosi cumani isca huaquin,
—Nan uhuun caifoancai ua nicacasmaifoanno mimacai huaquin nan niaifo Faraoncai ua nicapaimafinquin. Unfin atiatitsaquin. Uhuun tsaincai niaifoan tsain cuscaramaran, —ishon cumani.

¹³Ascano nocon Ifo Diosin Moisés yafi Aarón yononi cusca aton caifo Israelifo yafi Egipcio niaifo Faraón afanan yoinifo,

—Nocon Ifo Diosin noco yonoa isca huaquin,

“Maton caifo Israelifo Egipcio mai anoshon iyotacahuun,” —ishon noco yononi.

Aarón futan Moisés aton shunifohuunoa cununifo cuscan

¹⁴Israeli aton niaifo aton anufo cununifo. Nantifi manifoti nanfohuunoa cununifo isca huaquin:

Nan Rubén nanton Israel ahuun facu iyoaton. Rubén ahuun facu nocofunufu mani futsafoti ini. Nanfoan aton anufo Hanoc non Falú non Hezrón non Carmi. Nanfo Rubén ahuun facufo aton funafo mani futsafoti ini.

¹⁵Simeón ahuun facu nocofunufu Jemuel non Jamín non Ohad non Jaquín non Zohar non Saul. Nan Saúl ahua Cananea. Nanfo Simeón ahuun facufo aton funafo mani futsafo ini.

¹⁶Leví ahuun facu nocofunufori aton anufo Gerson non Coat non Merari. Ascano Leví ahuun fari nantifi ciento treinta y siete. Nanti fariyashu nani.

¹⁷Gerson ahuun facufo aton funafo tiri futsa ato mai ano ipaonifo. Ascashu pashcafainnifo. Futsa Libni ahuun funafo tiri futsa non futsan Simeí ahuun funafo tiri futsafori. ¹⁸Coat ahuun facu

nocofunufu aton anufo Amram non Izhar non Hebrón non Uziel. Ascan Coat ahuun fari nantifi ciento treinta y tres. Ascano nantifi fariyashu nani. ¹⁹Ascan Merari ahuun facu nocofunufu aton anufo nan iyoa Mahli non chipocuna Musi. Nanfo Levipan facufo mani futsafoan aton funafo tiri futsa ato mai ano ipaonifo. Nan iyoa cunui tauano acachori nantifi chipocufu cunupacuni.

²⁰Ascano Amram ahuun apa ahuun chico fiini. Ahuun anu Jocabed. Aton facu nocofunu rafu Aarón yafi Moisés. Ascano Amram nantifi ahuun fari ciento treinta y siete. Ascan nantifi fariyashu nani.

²¹Ascan Izhar ahuun facu nocofunufu aton anufo Coré non Nefeg non Zicri.

²²Ascan Uziel ahuun facu nocofunufu aton anufo Misaél non Elzafán non Sitrí.

²³Ascano Aarón Elisabet fu fiananni. Nan Elisabet Aminadab ahuun facu. Naasón chico. Ascan Aarón futan Elisabet aton facu cainni aton anufo Nadab non Abiú non Eleazar non Itamar.

²⁴Ascan Coré ahuun facu nocofunufu aton anufo Asir non Elcana non Abiasaf. Nanfo Corétafoan aton funafo tiri futsa aton mai ano ipaonifo.

²⁵Aarón facu Eleazar Futiel facu shomaya fiini. A futan facu ani ahuun anu Finees. Nanfo Leví funafo aton yorafo niaifofo mani futsa inifo.

²⁶Ascano nocon Ifo Diosin nan rafu Aarón yafi Moisés catonni. Ascashon ato yoiquin isca huani, —Israelifo nantifi mani futsafo Egipcio mai anoshon ato iyotacahuun, —ishon Diosin ato yononi.

²⁷Ascano nan rafu Aarón yafi Moisés Egipcio niaifo Faraonqui fonifo aton caifo Israelifo ahuun mai anoshon ato nichinon.

Nocon Ifo Diosin Moisés yoini cuscan Aarón tapimani niaifo Faraón yoinon

²⁸⁻²⁹Ascano nocon Ifon Diosin Egipcio mai anoshon Moisés yoini isca huaquin,

—Unfin min Ifo Diosiquin. Un mia tapimai cuscan nantifi Egipcio niaifo Faraón yoitahuun, —huaiton.

³⁰Ascaiton Moisés cumani,

—Uhuun Ifon, unfin atiatitsaquin. Uncai tsainsharatiroma. Ascan niaifo Faraoncai ua nicapaitiromaran, —ishon yoini.

7¹Ascano nocon Ifo Diosin cumani, —Ua nicahuun. Un Faraón yoipaiyai cusca min aqui cai minhuunoa un yoinon. “Moisés Diosin shafai,” Faraón mihuunoa shinanshquin. Un mia yoiyai cuscan min ochi Aarón niaifo Faraón yoitiro. Aarón min yoishomisi itiro.

²Ascan un mia yoiyai cusca nantifi Aarón yoihuu aafin Faraón yoinon.

“Niaifo Faraón, nocon Ifo Diosin mia yoiya nocon caifo Israelifo min mai anoshon nichihuun fosharatanonfo,” ishon Aarón uhuun tsain Faraón yoishquin. ³Nannori min yoiquin huafiacai Faraón mia nicapaima. Un Faraón ahuun nomuran curush huamai min yorafo nichinonma. Ato nichicasmaino uhuun yono ahuun mai Egipcio ano un ismai. Nantifi ahuun yorafoyashon ointiro un ahuamamishti huatiro cuscan. ⁴Un asca huafiacai mia nicashquima. Ascaino un Faraón yafi nantifi ahuun yorafo nan Egipciofo onaintimacoinshquin omitsiscanonfo. Ascan ahuun unutaqui uhuun yorafo Israelifo manifoti un ato Egipcio mai anoshon iyoshquin. ⁵Uhuun yono nan un ahuamamishti atiro cuscan un ato oinmashon shinan futsamashquin maton caifo nan Israelifo nichishquin. Ascaiton oinquin Egipciofoan tapishcani unfin Ifo Diosiquin, —ishon nocon Ifo Diosin yoini.

⁶Ascan nocon Ifo Diosin ato yononi cusca Moisés yafi Aarón aani. ⁷Moisés ahuun fari ochenta ahuun ochi Aarónna ochenta y tres ini. Nantian nan rafu

Faraón ano fonifo nocon Ifo Diosin nan yoipaiyai cusca tapimanon.

Aarón ahuun poquitihuunoa

⁸Ascatan nocon Ifo Diosin Moisés yafi Aarón yoini isca huaquin,

⁹—Faraón mato yoiquin isca huashquin, “Diosin mia nichicun ua ahuamamishti ismahuu un iconra huanon,” ishon mato yoiaiton Aarón min poquiti ahuun ointaifi mai ano potahuun. Min ascahuaino min poquiti rono oniriscatashquiran, —ishon Diosin yoini.

¹⁰Ascatan Moisés yafi Aarón Faraón ano cani Diosin ato yonoa cusca anon. Aarón ahuun poquiti mai ano potaino rono oniriscatani. Faraón yafi niaifo patasharinoaton oinnifo. ¹¹Nanscaiton oinquin Faraón ahuun yora nan Egipciofo aton mapo sharayafo non yofufo cunani. Aarón aca cusca nanfoannorifi aton yonohuunshon nansca huanifo. Nanfoan amisifo cuscacai aton caifo futsa tsoa atiroma. ¹²Nantifi nan yofufoan aton poquiti mai ano potaino rono oniriscatani. Nansca huafiafo Aarón ahuun poquitinin atona shuani. ¹³Faraón nan oinfiashocai nocon Ifo Diosin yoini cuscan ahuun nomuran curush huani. Ascafiacai Faraón Moisés yafi Aarón nicapainima.

Egipcio mai ano unu fianananriscatani imicoin ini

¹⁴Asca huatan chipo nocon Ifo Diosin Moisés yoini isca huaquin,

—Faraón ahuun nomuran curushcain huani. Ua nicacasmacoin. Ascan min caifo Israelifo nichiamia. ¹⁵Ascacun afanan Faraonqui catahuun. Funamarishta unu Nilo cusumunri aqui nocoli cahuun. Min poquiti nan rono oniriscata nan fotahuun. Min Faraonqui min unu cusumunri nocoicaiquin.

¹⁶Yoihuu isca huaquin,

“Nonfin Hebreofoquin. Nocon Ifo Diosin ua miqui nichia un mia ahuun tsain yoinon isca huaquin, ‘Uhuun yorafo nichihuun tosa istaipama anoshon ua cufinfain uhuunoa shinansharafain un ato amapaiyai cusca anonfo. Mia yoia cuscan min nicataima’ ”¹⁷⁻¹⁸Ascacun nocon Ifo Diosin afanan mia yoi isca huaquin, “Un Moisés yonoa ahuun poquitin unu Nilo tsacan. Ascano unu tsacaino fiananriscatanon imi inon. Ascan shimanfo unu Nilo murannoa nai futsushquin. Fasi piisicoin iishquin. Nansca huano min non min caifo Egipciofo nan unu Nilo afanan ayatiroma. Un asca huaino min tapitiro Unfin Ifo Diosinquin,” ishon min nannori Faraón ua yoishotiro, —ishon nocon Ifo Diosin Moisés yoini.

¹⁹Ascatan nocon Ifo Diosin Moisés yoini,

—Aarón yoihuu ahuun poquiti tsomanon Egipcio ato unu amanaanri susoaino nantifi unufo non shushafo non ianfo non unu pozofori fiananriscatan imicoin iishquin. Nantifi Egipcio mai anoa imicoin iishquin. Nantifi cutifo muranri imi iishquiran, —ishon nocon Ifo Diosin Moisés yoini.

²⁰Ascano nocon Ifo Diosin ato yononi cuscan Moisés futan Aarón huani. Faraón yafi ahuun niaifo patasharinofo aton ointaifin Aarón ahuun poquiti finifoantan unu Nilo tsacaino unu fiananriscatani imicoin inon.

²¹Ascano shiman unu Nilo murannoa nai futsuni. Fasi pisincoincun Egipciofoan tsoan na unu ayatiroma ini. Nantifi Egipcio mai anoa nan unufoti imicoin ini.

²²Nansca huaiton oinquin Faraón ahuun yofufoanri yoshinfohunshon nanscari huanifo. Ascashon Faraón ahuun nomuran afanan curush huani. Nocon Ifo Diosin ato yoini cusca

Faraoncai Moisés yafi Aarón nicapainima. ²³Asca nicatamarocon ahuun pushu muran iquishon shinanquin isca huani, —Ua isma cusca uhuuna ahuamaran, —ishon Faraón shinanni. ²⁴Ascan ahuun caifofo Egipciofoan unu Nilo cusumunri mai poquinifo unu shara ayashcaquin. Unu Nilocai tsoan ayatiroma inima. ²⁵Ascashon nocon Ifo Diosin Egipciofoan aton unufoti chacana huani. Osha mucu fustiti non mucu naman cayanoati osha finontacai tsoan ayatiroma inima.

Fushco ichaparasi Diosin Egipto mai ano onihuariscatani ato fucash huanon

8 ¹Ascashon nocon Ifo Diosin Moisés yoini isca huaquin,

—Afanan Faraonqui cashon ua yoishotahuun,

“Nocon Ifo Diosin mia yoia isca huaquin,

“‘Uhuun yorafo nichihuun ua cufinfain un ato yomisi cusca anonfo.

²Min ato nichiyamaino un nantifi maiufoti fushco huarasi nichishquin mato fucash huanon. ³Unfin unu Nilo naqui fushco ichapacoin nichicain. Ascano min pushu muran iquifain min oshati muran iquifain min niaifo

patasharinofo min ato catoan aton pushu muranri iquimafain min

yorafoquin nantifi un atoqui fushcofo nichin maton pichati muran yafi maton ahuara tsoiti muranri un iquimashquin.

⁴Min non min yorafo non min niaifo patasharinofoquiri un fushco ichapa nichiaimo man fasi omitsiscashquiran,”

ishon Faraón yoitahuun, —Diosin Moisés yoini.

⁵Ascano nocon Ifo Diosin afanan Moisés yoini isca huaquin,

—Min ochi Aarón yoihuu ahuun poquiti Egipciofoan ato unu non shushan non ianhuuri susonon. Asca

huaino nanhuurinoashu fushcon huarasi Egipcio maifoti atoqui funon, —ishon Diosin Moisés yoini.

⁶Diosin yoia cusca huaquin Aarón ahuun poquiti nan unfotihuuri Egipcio maihuuri susoni. Susoaino fushco huarasi ato muran nocoriscatani. ⁷Nantianri nan yofufoan nanscari huaquin yoshinfohunshori fushco huarasi unu murannoa machi mapumanifo. ⁸Ascashon Faraón Moisés yafi Aarón cunani ato yoiquin isca huani,

—Ua mato Ifo Diosi cufinshocahuun un non uhuun yorafomaquinoashu fushcofo fotanon. Man asca huano un maton caifofo nichishotiro mato Ifo Diosi cufinfain man maton inafu rutushon Diosin mato yonoa cusca ismashquin, —ishon Faraón Moisés yafi Aarón yoini. ⁹Asca huaiton Moisés Faraón cumani isca huaquin,

—Min ua tapimatiro ahuutiamain min non min niaifo patasharinoafu non min yora futsafori un nocon Ifo Diosin mato cufinshotiroquin mato anoashu fushcofo unu Nilo muran afanan fotanon nan muran fusti inonfo, —Moisés huaiton.

¹⁰—Funamari ua cufinshohuun, —ishon Faraón yoiatton.

—Mian yoia cusca un mia Ifo Diosin cufinshonon. Ascano min tapitiro tsoa futsacai nocon Ifo Diosin cuscarama.

¹¹Fushcofo nan maton pushu murannoashu foatian unu Nilo muran fusti itiro. Afanancai mia non min niaifo patasharinoafu non min yoraforti mato fucash huaimaran, —ishon Moisés Faraón yoini.

¹²Ascatan Moisés fu Aarón Faraón pushu anoashu fonifo. Ascano iyoconaino Moisés nocon Ifo Diosi cufini fushcofoan afanan Faraón fucash huanonma. ¹³Moisés nan cufiain cusca Upa Diosin nicani. Ascashon Diosin fushcofo namariscatani. Egipciofoan aton pushu murannoafu namafain ato

umaintinoafori namafain aton mau anoafori namani. ¹⁴Ascano Egipciofoan fushco naafu ichanan huashon nannosi machinifo. Nantifi mai anoashu fushcofo naafu fasi pisicoin tohuuni.

¹⁵Ascafia nocon Ifo Diosin Moisés yafi Aarón yoia cusca Faraón ato afanan paranni. Ascano Faraón oian afanan fushcofo ahuun yorafo fucash huayamaiton oinquin ahuun nomuranshon afanan shinan futsashon Moisés yafi Aarón nicacasmani.

Upa Diosin Egipto mai ano shion huarasi fomani ato fucash huanon

¹⁶Ascaiton nocon Ifo Diosin Moisés yoini isca huaquin,

—Aarón yoihuu ahuun poquitinin mai tsacanon. Tsacaino nan mai mapo fiananriscatanaino nantifi Egipcio mai ano shion huarasi oniriscatanon, —ishon Diosin Moisés yoini.

¹⁷Diosin yoia cusca Aarón ahuun poquitinin mai tsacani. Tsacaino nantifi mai mapo Egipcio ano fianananariscatanaino shion huarasi iriscatani. Yorafo non inafu fasi fucash huani. ¹⁸Ascano nan Egipciofoan ato yofufoanri aton yoshinhuunshon nanscari huapaiquin ranannifo. Shion huarasi muucani yorafo ato inafuya fupoi futsunifo. ¹⁹Ascano nantian nan yofufo aton niaifo Faraón ano fonifo.

—Aton Diosin na shion huarasi nocoqui fuma noco omitsiscamanon, —ishon ato niaifo yoinifo.

Ascafiafai Faraón ato nicapainima. Ahuun nomuran sinacoinquicain ato nicapainima. Nan Diosin Moisés yafi Aarón yoiyoni cusca man hua.

Diosin Egipto mai ano napun huarasi nichini ato fucash huanon

²⁰Ascashon nocon Ifo Diosin afanan Moisés yoini isca huaquin,

—Funamarishta funihuu. Faraón unu ano nashi caiquin aqui nocoshon yoihuu isca huaquin,

“Nocon Ifo Diosin mia yoia isca huaquin, ‘Uhuun yorafo nichihuun ua cufinfain un ato yoimisi cusca anonfo. ²¹Min ato nichiyamaiton un min mai ano napu ichapacoin un nichin. Min pushu muran iquifain nan niaifo patasharinoafon pushu muranri iquifain nantifi min caiffoan aton pushu muran fasi napu ichaparasi iquinon. Nantifi maton maitio napu huarasi mai ano fuponon afanancai man mai ointiro iquima. ²²Ascafia nan uhuun yora Israelifo Gosén mai ano icafoanno cai napu fustishta ishquima. Ascano min tapitiro unfin ato Ifo Diosiquin un nuno min mai ano ica uhuun yorafo cushushquin. ²³Nan un mato omitsisca huaitiancai uhuun yora Israelifo un omitsisca huaima. Unfin ato cushuicain napufo ato ano nocononma. Na funamari un ahuamamishti huatiro cuscafin min oincal,’” —ishon Diosin Moisésuunshon Faraón yoini.

²⁴Ascashon nan nocon Ifo Diosin yoia cuscacoin huani. Napun huanrasi Faraón pushu muran iquimafain niaifo patasharinoafon pushu muran iquimafain nantifi Egipciofo icano napun huanrasicoin ini. Ato mai ano fasi chacana huani.

²⁵Nanscara oinquin Faraón Moisés yafi Aarón yoimariscani,

Ascashon Faraón ato yoini,

—Maton Diosi man cufintirofia tsoa istaipama ari foyamacahuun. Nocon mai ano fustishon man Diosi cufintiro nunoshon maton inafon Diosin mato yononi cusca man rutushotiroran, —ishon Faraón Moisés yoini.

²⁶—Ascaracai sharama. Nocon Ifo Diosi noco yonoa cusca non inafon rutushonai cuscacai min yorafoan

oinpaitiroma. Nanfoanfin inafon noicaniquin. Ascacun non inafon rutuaiton oinquin noco toquirinin tsacatirofo non naanon. ²⁷Non mato mai anoashu osha rafu non fusti cayoicai nannoshon nocon Ifo Diosin noco yonoa cusca non ashoin. Nanno tsoa istaipamashon non nocon inafon rututiro Diosi ismashquin nan non tanasharai cusca nofiri Ifo Diosi inanshquin, —ishon Moisés cumaiton.

²⁸Nannori huaiton nicaquin Faraón cumani isca huaquin, —Un mato nichitiro maton Diosi mato yonoa cusca man inafon rutunon. Ascafia chai foyamacahuun. Natianroco maton Diosi uari cufinshohuun, —huaiton.

²⁹—Ai. Un miqui canon mia samamashta nocon Ifo Diosi cufinshoshquin. Ascano funamari min non min niaifo patasharinoafon non min yorafomaquinoashu nan napufo foi futsui. Ascacun afanan noco parayamahuun. Min noco yoia non catiro. Ascacun nonfin nocon Ifo Diosi inafon rutushopaicai afanan noco nitu huayamahuu, —ishon Moisés Faraón yoini.

³⁰Ascano Moisés Faraón icano cani nocon Ifo Diosi cufinshoshquin.

³¹Moisés cufiain cuscan nocon Ifo Diosin ashoni. Nantifi nan napufo Faraón non ahuun niaifo patasharinoafon non ahuun yorafo icanoashu napufo foni. Nantian napufo yamariscatani.

³²Ascafia nantian afanan Faraón fasi ahuun nomuran curushmana Ifo Diosi nicacasmai. Ascashocai afanan Israelifo nichinima.

Diosin nantifi Egipcio aton inafon namani

9 ¹Ascashon nocon Ifo Diosin afanan Moisés yoini isca huaquin, —Faraón ano afanan cashon yoitahuun isca huaquin, “Uhuun caifo

Hebreofoan nocon Ifo Diosin nanton mia yoipai isca huaquin, ‘Uhuun yora Hebreofo nichihuun ua cufinfain un ato yoimisi cusca anonfo,’ ishon mia yoi. ²⁻³Min ato nichitama min ato nitu huaino nocon Ifo Diosin mia non min caifo onaintimafain mato inafu fasi funununnoafo ato namashquin. Maton caballofo non burrofo non camellofo non moifo non chashoanfo non nantifi nanfo nai futsushquin. ⁴Ascano nocon Ifo Diosin Israelifoan aton inafu cushmanocai pau fuchicanima. Fustishtacai naimafinquin. Matona fusti nai futsushquiran,” —ishon Moisés Faraón yoini.

⁵Nocon Ifo Diosin yoini isca huaquin, —Na funamari Egipciofo ato inafu pau fuchiashu nai futsucaniran, —ishon yoini.

⁶Ascano iconcain nan yoia cusca ai iyoconaino nocon Ifo Diosin yonoa cusca nantifi Egipciofo aton inafu nai futsuni. Ascafiainocai Israelifona fustishta nanima. ⁷Nantian Faraón ahuun yorafo nichini Israelifoan aton inafohuunua tapishquin. Ascano Faraón ahuun yorafo aqui nasoshon yoinifo isca huaquin, —Niaifo Faraón, Israelifoan aton inacai fustishta namafinquin, —ishon yoinifo. Ascafiano nantian Faraón ahuun nomuran curush huani Israelifocai nichipainima.

Nantifi Egipcio mai anofo aton yoratishon cooyoi futsuni

⁸Ascaino afanan nocon Ifo Diosin Moisés yafi Aarón yoini isca huaquin, —Chii mapo muspohuu. Moisés min Faraón ahuun ointaifi nan chii mapo fomancaya saa ahuu. ⁹Nan min saacaino samamashta Egipciofo non aton inafu pau yoratishon cooyoi fuchiriscanonfo. Nantifi yorafo fuchinonfo, —ishon Upa Diosin Moisés yoini.

¹⁰Nannori nicatan Moisés fu Aarón Faraón ica ano nocotan Moisés chii mapo amanaon saani. Saatanaino yorafo non inafu pau yoratishon cooyoi fuchiriscatanifo. ¹¹Ascaino yofufoancai Moisés aca cusca ahuun ointaifi huatirofo inima. Nan yofufuoripau yoratishon cooyoi futsunifo. Nan aton caifofo nantifi Egipcioforipau yoratishon cooyoi fuchinifo. ¹²Ascaino nocon Ifo Diosin Faraón ahuun nomuran curush huani Moisés yafi Aaróncai nicapainima. Nannori Diosin Moisés tapimayoni.

Egipcio mai ano unu matsi tocoronunhuanfo pacuni

¹³Ascaino nocon Ifo Diosin Moisés yoini isca huaquin, —Funamari shafaino funiriscahuun Faraón yoitashquin, “Uhuun caifo Hebreofohuunua nocon Ifo Diosin mia yoia isca huaquin, ‘Uhuun yorafo nichishohuun ua cufinfain uhuunua yoisharanonfo. ¹⁴Min ua nicacasmaiton un mia omitsiscamaimia non min niaifo patasharinofo non nantifi min caifofo nan man muyomisima cuscara un mato omitsiscamaimia. Ascano man tapitiro manifesti anoshon tsoa futsacai ua cuscarama. Urus fustifin un ahuamamishti huatiroquin. ¹⁵Un mato onaintimapaiquifin un mato omitsiscama cuanaquin man nai futsunon. Afanancai man na mai ano icuanama. ¹⁶Ascafiacai un mato asca huama. Un mia niaifo ima un minhuunshon min non min yorafo non nantifi manifesti anofo un ahuamamishti huatiro cusca tapinonfo.

¹⁷“Un mia omitsiscamafaitocai mian nicataima. Min shinanraca un ahuama. Uhuun yorafocai min ato min mai anoshon nichipaima. ¹⁸Natiafin min ua tapincai. Funamari un unu matsi

tocoronunhuafo min mai ano potai. Min non min yorafoanricai ascara oinyomisima. ¹⁹Min yorafo yoiriscahuun mato inafo pushu muran iquimanonfo. Ascano mato inafo nanonma. Nan yora chifi nia iyamarai ahuara inafo chifi niafin naiquin,’” ishon Faraón yoitahuun, —ishon Diosin Moisés yoini.

²⁰Diosin yoia cusca nicatan Faraón ahuun niaifo patasharinoafoan fusti rasiton icoinra huashu ratucoinnifo. Ascano aton yonomamisifo non inafo pushu muran iquimanifo. ²¹Ascafia atirifi ahuun niaifo patasharinoafoan shinan Diosi yoia cuscacai ahuama. Ascashocai aton yonomatififo non aton inafo tsoan pushu muran iquimanimi. ²²Ascaino nocon Ifo Diosin Moisés yoini isca huaquin,

—Nai ari mutohuun Egipcio maifoti ano unu matsi tocoronunhuanfo yorafo non inafo non fanafo camaqui pacunon, —ishon yoini.

²³⁻²⁴Ascashon nocon Ifon Diosin yonoai cusca Moisés nai ari mutoni. Asca huaino nai turuicain cana piishicain unu matsi tocoronunhuanfo nai ariashu maiquin pacui futsuicai funa nishmanima. Nan Egipciofoan tau iypaonifotiancai tsoan ascara oinyopaonima. Natian tsoan oinyomisima cuscaran. Fasi chaca musucuin oinnifo. ²⁵Nan Egipcio mai anoa ahuafo chacana huaquin futsani. Nan chifi niafo nai futsunifo. Yorafo non inafori nai futsunifo. Tsoashtacai tushunima. Nantifi ihuifo potu cumaqui futsaino pacui futsuni. Aton mau anoa yonofori chacana huaquin sapa huaquin futsani. ²⁶Nan Egipciofo ano ascfaiainocai Israelifo icafoanno nan Gosén anocai unu matsi tocoronunhuan fustishta pacunima.

²⁷Ascaiton oinquin Faraón Moisés yafi Aarón tsain fomani aqui fononfo. Ascano ato yoini,

—Natian mun tapia un chaca hua. Ifo Diosin icon fusti yويمisi. Un uhuun yorafoyashon amaquri un shinanmisi. ²⁸Ascan natian fasi nai turuicaino unu matsi tocoronunhuanfo pacui futsuainocai non afanan tunuima. Ascacun noco maton Ifo Diosin cufinshohuun nai turuicai non unu matsi tocoronunhuanfo nishma huanon. Ascacun min noco cufinshonaino un mia non min caiffo nichishoriscatiroran, —ishon Faraón Moisés yoini.

²⁹Ascaiton Moisés cumani isca huaquin,

—Un natian maton pushu rasi anoashu uhuun pushu ano cai. Un caitian uhuun mucu rafu nai ari mushainacahuatan un nocon Ifo Diosi un cufincal. Un cufiainno nai turuiquin unucain unu matsi tocoronunhuanfo pacui nishmashquin. Ascaiton min tapitiro nocon Ifo Diosin nantifi maifoti ahuamamishti huatiro. Nantifi maifin ahuunaquin min non min yorafoanri tapinonfo. ³⁰Ascafia munfin tapia min non min niaifo patasharinoafocai nocon Ifo Diosiqui ratuataimaran, —ishon Moisés Faraón yoini.

³¹Nan fana ahuun anu lino yafi futsa ahuun anu cebada oshiaitian nan unu matsi tocoronunhuafo nai murannoashu pacuaino sapa huaqui futsani. Nantifi chacana huaqui futsani. ³²Ascano nan fasi ushu yafi fana futsa ahuun anu centenocai foaicataiyamanfaiatocai chacana huanima.

³³Ascaino Moisés Faraón pushu murannoashu caincaitan pushu rasi mapai caintan ahuun mucu rafu nai ari mushainacahuan nocon Ifo Dios cufini. Cufiainno nai turuica yafi unu matsi tocoronunhuanfo pacui nishmariscatani. Afanancal oin huarasi funima. ³⁴Nan cufiain cuscacai afanan oi fuyamacain

unu matsi tocoronunhuanfo afanan
pacuyamacain nai turuiyamacai nantifi
nishmariscani. Nanscaiton oinquin
Faraón afanan shinan futsacunfoanni.
Faraón fustitocai shinanchacanima.
Ahuun niaifo patasharinoafanri
shinanchacanifo. Ascashon afanan
Faraón yafi ahuan yorafoan shinan
futsatani. ³⁵Nocon Ifo Diosin
Moisés huunshon yoiyoni cusca Faraón
ahuun nomuranshon curush huani
Israelifo nichipainima nanfoan nocon
Ifo Diosi cufinonfo.

**Nocon Ifo Diosin ocutsuruhuanfo
Egipcio mai ano nichini**

10 ¹⁻²Ascano nocon Ifo Diosin
Moisés yoini isca huaquin,
—Unfin Faraón yafi ahuan niaifo
patasharinofo un aton nomuran
curushmanicai un ahuanamishti huatiro
cusca nantifi yorafoan oinonfo.
Ascashon min non min caifofoanri un
ahuanamishti huatiro oinquin maton
facufo non mato funafori man ato
tapimatiro. Min nantifi yoitiro un
Egipciofo onaintimaiton minrifi oinquin
min tapicointiro unmain maton Ifo
Diosincufin. Ascacun un Faraón
yoipaiyai cusca min ua yoishotiro.
Faraón ano catahuun yoishquin, —ishon
nocon Ifo Diosin Moisés yoini.

³Nannori nicatan Moisés yafi Aarón
Faraón pushu ano fonifo Diosin ato yoia
cuscan Faraón tapimashcaquin. Ascano
yoiquin isca huanifo,

—Nonfin Hebreofoquin. Nan nocon
Ifo Diosin mia yoipaiyai cuscan non mia
tapimai oa. Mia yoipai isca huaquin,
“¿Ahuutiamun min apai cusca fusti min
atamarocon ua nicacoin? Uhuun yorafo
nichihuun ua cufintanonfo. ⁴Min afanan
ato nichiyamaiton funamari un min mai
ano ocutsuruhuanrasi nichin mato
fucash huanon. ⁵Nantifi Egipcio mai ano

ocutsuruhuanfo nan maitio manianocai
man afanan mai oinshquima. Nan unu
matsi tocoronunhuanfo maton fanafo
chaca huaita. Nan tushuitanfori
ocutsuruhuanfoan cuyoi fucani. Nantifi
ihuifori cuyoshquin. Na funamari
ocutsuruhuanfo min icanoa ahuafo
maton pianquin anaiti fucani. ⁶Maton
pushu muranfin ocutsuruhuanfo fospo
fucaniquin. Min pushu anoa niaifo
patasharinofo non nantifi min
caifofoan maton pushu muran
ocutsuruhuanfo fospicoishquin. Mato
upafo non mato shunifoanri nantian
ascara oinyomisifoma. Man fasi
omitsiscairan,” ishon nocon Ifo Diosin
mia yoiaran, —ishon Moisés Faraón
yoini.

Tsainquin unutan Moisés fu Aarón
Faraón pushu anoashu fonifo. ⁷Nannori
nicatan Egipcio niaifo
patasharinofoan aton niaifo Faraón
yoinifo isca huaquin,

—Niaifon, na nocofunu
Moisés huunoashu non fasi omitsiscai.
¿Min tapiamamun nantifi nocon mai
man chacanai futsui? Moisés yafi ahuan
caifofo nichiriscahuun aton Ifo Diosin
ato yonoa cusca huafain cufinonfo,
—ishon yoinifo. ⁸Nannori huaifoan
nicatan Faraón ahuan oinmati nichini
Moisés yafi Aarón aqui funonfo. Aqui
fuafoan ato yoini isca huaquin, —Maton
Ifo Diosi man cufin fotiro. ¿Ascafia man
cataima tsoafo mato fu caimun ua
tapimahuun? —ishon yocaiton.

⁹—Nantifi nocon caifo noco fu
foshquicani. Nocon facufo furonafacufo
non shomayafo non yomumishti caino
anifofo non yoshafofori nantifi nocon
yorafo foshquicani. Nantifi nocon inafori
non iyoshquin. Nantian nocon Ifo
Dioshuunoa non shinanyanan non fusi
cai. Ascatare non cufinshquin. Ascacun
non nantifi cairan, —ishon yoini.

¹⁰Nannori yoiaiton nicaquin Faraón yoini,

—Mun matohuunoa tapian. Man ua parapai. Minfin ua fomaincai. ¿Man shinanmun maton ainfofo yafi maton facufo maton Ifo Diosiri mato fu caiquin? Man shinanchacai cuscacai un tapipaima. ¹¹¡Ma! Uncai mato ainfofo yafi facufo nichishoshquima.

Nocofunufosi man fotiroquin mato Ifo Diosi cufinshquin. Nan man ua yoimisi cusca nocofunufosi man fotiro.

Natian umaquinoashu catahuun. Ua fucash huayamahuu. Natian nunoashu cariscatahuun, —ishon Faraón ato curushcain yoini. ¹²Ascano nocon Ifo Diosin Moisés yoiquin isca huani, —Min mucu nantifi Egipcio maihuuri mushanhuun. Min ascaino ocutsuru ichaparasi fucani. Nan ahuara unu matsi tocoronunhuanfoan sapa huaquin tushu huaitafo yonofu piquin cuyoshquicani, —ishon Diosin yoini.

¹³Nannori nicatan Moisés ahuun poquiti Egipcio maihuuri susoni. Ascano nocon Ifo Diosin yononi fari oaiquirinoa ninhuunhuan curushupacoin Egipciofo mai ano noconon. Shafatishon non yamutishon fasi ninhuun huanon. Ascano funamarishta ninhuunhuanun ocutsurufo atogui fumanon. ¹⁴Tsoancai Egipcio mai anofoan ascara oinyomisifoma. Ascanocai afanan ascapacunacama. Nantifi Egipcio mai ano ocutsuruhanfo noconi. Tsoancai ato tanan huatiro inima. ¹⁵Nantifi maitio ocutsuruhanfoan fupoanocai afanan tsoan mai ointiro inima. Ocutsuruhanfo fusti mania oinnifo. Nan ocutsuruhanfoasi mai fupoa fisocoin ini. Nantifi fanafori piiquin cuyonifo. Nan ahuara unu matsi tocoronunhuanfoan sapa huaquin tushu huaitafo yonofu piiquin cuyonifo. Ihui fimioma yafi ihui fimiyafo nantifi

piquin cuyonifo. Egipcio mai anofoforicai niifo ahuun puishta aya inima. Ocutsurufoancai ahuashta piqui tushu huanima. Nantifi piquin cuyocoinnifo.

¹⁶Nanscaiton oinquin Faraón samamashta afanan Moisés yafi Aarón yoimani ato yoishquin,

—Unfin maton Ifo Diosi yafi matori chaca huamisiquin. ¹⁷Un chaca hua cusca afanan ua rau huapun. Maton Ifo Diosi ua cufinshocahuun nan ocutsurufo noco mai anoashu fotanon non nanoma, —ishon Faraón yoini.

¹⁸Nannori ato yoiaiton nicatan Moisés yafi Aarón Faraón icanoashu fonifo Diosi cufinshcaquin. ¹⁹Moisés nocon Ifo Diosi cufiainno Diosin yonofu cusca ninhuunhuan fari caiquirinoashu nocoaino nantifi ocutsuruhanfo unuhuan ahuun anu oshin muran pacui futsuni. Ocutsuru fustishtacai Egipcio mai ano tushunima. Nantifi Egipcio mai anoashu foi futsuni. ²⁰Ascaiton afanan nocon Ifo Diosin Faraón ahuun nomuran curush huamani Israelifo nichinonma.

Diosin yononi nantifi Egipcio mai ano faquishinhuancoin inon

²¹Ascatan afanan nocon Ifo Diosin Moisés yoini isca huaquin,

—Min mucu nai ari mushanhuun. Min ascaino nantifi Egipcio mai ano faquishihuancoin inon. Ascara faquishcai tsoan oinyomisima. Egipcio mai anoshon nan faquish iishquiai cusca Egipciofoan oinshquicani. Moisés, min mucu mushanhuainifoanhuun min ascatapayaino faquishihuancucahuanon. Nan Egipciofo icafoti faquishihuanriscatashquin, —ishon Diosin yoini.

²²Nannori nicatan Moisés ahuun mucu nai ari mushaino nantifi

Egipciofoan aton mai ano osha rafu non fusti faquishihuancoini. ²³Nantiancai tsoan ahuashta ointiroma ini. Aton pushu murannoashucai tsoanshta raqui catiro inima. Ascafiaianocai Israelifo ato chaima icafoannocai faquish inima. Nan Israelifo icafoanno shafa shara ini.

²⁴Ascaino afanan Faraón Moisés yoimani ahuunoa yoishquin,

—Ascashon yoiquin isca huani,
—Natian man catiro. Maton ainfofo non maton facufori mato fu catiro mato Ifo Diosi cufinfain ahuunoa yoisharashcaquin. Mato inafu iyoyamacahuu, —huiton.

²⁵Nicaquin Moisés cumani,
—Nonfin noco inafu yopaicain nocon Ifo Diosin yononi cusca atirifi rutushon coo huashquin. Non asca huaino non nocon Ifo ismai noco chaca shatushquin nan tanasharashquin.

²⁶Nantifi nocon inafofin non iyoicaicain. Fustishtacai non tushu huafainicaima. Non na mai futsa ano nocoataima non tapitiroma ahuuti ina non yopatiromainquin. Ascan non mai futsa ari nocoaitian inaomashu nocon Ifoan noco yonoo cusca non atiroma. Nocon Ifo Diosin non nansca huaquin ismai non ahuun noicoquin noco yonoo cusca non anon, —ishon Moisés Faraón yoini.

²⁷Asafia nocon Ifo Diosin yononi cusca Faraón ahuun nomuran curushmainocai Israelifo afanan nichinima. ²⁸Ascano Faraón Moisés yoini isca huaquin,

—Natian umaquinoashu catahuun. Afanan natian uqui oyamahuu. Min ua afanan oin min nariscatiroran, —ishon Faraón Moisés yoini.

²⁹Nannori huiton nicaquin Moisés cumani isca huaquin, —Icon. Min ua yoia cusca uncai afanan miano onacamaran, —ishon cumani.

Egipciofo ato furun iyoafofo namai cuscan nocon Ifo Diosin Moisés tapimani

11 ¹Nocon Ifo Diosin afanan Moisés yoini isca huaquin,
—Natianfin un afanan Faraón yafi ahuun caifofo onaintimaicain. Ahuun unutaquin nan fusti un afanan ato onaintimai. Ascaino nan un ato onaintimaino ipaitama Egipciofo mai anoshon mato nichishquicani. Ascashon mato yoishquicani isca huaquin, “Nocon mai anoashu fotacahuun,” ishon Faraón mato yoishquin. ²Ascashon min caifo nantifi Israelifo nocofunufu non ainfofori ato yoihuu Egipciofo mato chaima icafo aton tuhuuti yafi ahuara futsafo cuno sapa facafacaitsa yafi oro sharashta ato yocacahuun mato cashmancoini inanonforan, —ishon nocon Ifo Diosin Moisés yononi.

³Nocon Ifo Diosin yononi Egipciofoan Israelifo ato shara huanon. Nan Egipciofo niaifo patasharinoafonanri Moisésahuunoa shinansharapaonifo. —Moisés nocofunu shara. Fasi ahuara tapicoianran, —ishon ahuunoa yoipaonifo. Nantifi Egipciofoan nannorifosi Moisésahuunoa shinanapaonifo.

⁴Ascashu Moisés Faraón ano cani. Nocotan yoiquin isca huani, —Nocon Ifo Diosin ua miqui nichia un ahuun tsain mia yoinon. Ascatan mia yoia isca huaquin,

“Na yamunacukahuanaino un min maifoti finonfoicai. ⁵Ascacun min caifo Egipciofo nantifi maton furu iyoafofo nai futsui. Asafia min furu iyoafofo chipo niaifo icuana natian arifi nai. Maton yonomatifoan aton furu iyoafofori nai futsui. Nantifi maton inafu aton facu iyoafofori nai futsui. ⁶Ascano min mai Egipciofo anoafori nantifi fasi ato manocani. Oi ashcafinin uaishquicani. Min mai anoashu tsoancai na omitsisca

cusca muyomisima. Afanancai
ascapacunacama.

⁷“Ascafianocai Israelifo tsoa naima.
Tsoancai ato muima. Aton inaforicai
ahuuscaimaran,” ishon nocon Ifo Diosin
mia yoiquin. Ascano man tapitiro nocon
Ifo Diosin matohuunoa shinain cuscacai
nocohuunoa shinainma. Manfin nocon
Ifo nicacasmaiton maton
onaintimashquiquin. Nonfin nocon Ifo
Diosi nicasharamisiquin. Nanscacun
maton onaintimai cuscacai noco
onaintimashquima. ⁸Nantian mato facu
iyoafofo naino min niaifo patasharinoafo
uqui fushcani. Ascashu naman
tutipacucahuanan ua yoishquincani isca
huaquin, “Min non mia tanamisifori
noco mai anoashu fotacapun,” ishon ua
yoishquicani. Ua mian anori yoiataima
un non uhuun yorafocai mato mai
anoashu caimaran, —ishon Moisés
Faraón yoitán fasi sinacaini
Faraonmaquinoashu Moisés caní.

⁹Moisés Faraonmaquinoashu cataima
nocon Ifo Diosin yoini isca huaquin,
—Faraoncai mia nicashquima.
Ascacun uhuun curushhuunshon un
ahuamamishti huatiro cusca nantifi
Egipcio anofoan oinshquicaniran,
—ishon nocon Ifo Diosin Moisés yoini.

¹⁰Nocon Ifo Diosin ahuun
curushhuunshon Moisés futan Aarón
ahuamamishti Faraón ointaifi huanifo.
Asafia Diosihuunshon Faraón ahuun
nomuran curush huaino Moisés icoinra
huanima. Ascashocai Israelifo Egipto
mai anoshon nichipainima.

**Diospan oinmatinín Israelifo finoainno
Egipciofo aton furun iyoafofo namani**

12 ¹Ascaino nocon Ifo Diosin
Egipto mai anoshon Moisés yafi
Aarón yoini isca huaquin,

²—Nan na oshu tauí matona fasi
shara finacaia. Nan fari tauaitianri mato

oshu nanscasi apanaca. ³Nantifi min
caifo nan Israeli pushuyafotiton aton
apafoan na oshu mucu rafuti osha
finontan chashoanun facushta iyamarai
cabra uhuapamamishti man fipatiro.

⁴Nan fusti rasi icafo anoshoncai
chashoanun facu muma pitirofoma nan
ato chaima icafo fu pashcanantirofo
nantifishon piishcaquin. Ahuuti
yoramainquin pushuti man tanan
huatiro. Ahuutifainmain pitirofoquin.
Ascashon shinantirofo ahuuti chashoan
facumain yopatirofoquin
pisharashcaquin.

⁵Nan inafaan facu fari fusti finoan
funu fosi nan mumasharati man
catontiro. Chashoanun facu iyamarai
cabranun facu man catontiro. ⁶Ascatan
nan ina facumishti cushusharacahuun.
Ascan nan oshu nushmancayan rafu
nuuano nan shafatan fari caino nantifi
min non min caifofoanri maton inapan
facu rutucahuun. ⁷Ascashon maton
pushu anoshon man chashoan facu
piaitima maton pushu caincaiti ocuma
rafu non amanaonriri nan inafaan aton
imin raishacahuun. ⁸Ascano nan
yamutan nantifi chashoanun facu ahuun
nami tsoishon piifain nan fana futsa
focashcoirni pifain misi faranshati
maisiri picahuun. ⁹Ascashon ahuun
nami pichamuama piyamacahuun. Nan
nami nanushon fusti picahuun. Ahuun
mapo non ahuun quishifo non ahuun
ointi non ahuun tacari nanfo
nanucahuun. ¹⁰Ascashon nan yamu
nantifi picahuun. Ahuara tushua
iyoconaino afanan piyamacahuun. Nan
pitamarocon coacahuun. ¹¹Ascano nan
man piaitian maton sahuuti sahuufain
sapato sahuufain maton poquitifo
tsomashon picahuun. Unfin maton
Ifoshon un mato ascarafo pimaicain. Na
yamutan un mato finonfainnicai nan
Egipcio aton furun iyoafofo fusti un

namashquin. Ascacun nan man piaitian piriscacahuun.

¹²Nan man piai yamuri un Egipciofo nantifi ato pushu ano cai aton furun iyoafofo namashquin. Ascashon nantianri aton inapan facu funu iyoafofosi un ato namaquin futsai. Nan Egipciofo aton diosiran ishon afin ahuara rami huafofin un chacana huaicai. Unfin ato ismaicai nanfocai ahuama. Un Egipciofo ato onaintimai cuscacai tsoan ato numatiroma. Ascano Egipciofoan tapitirofo aton diosifocai Diosicoinfoma. Urus fustifin un Ifo Diosiquin.

¹³Ascan man maton pushu caincaiti imin raishaca oinquin un tapitiro un mato yoia cusca man aa. Ascano nan imi oinquin un mato pushu ano finonfainnicai maton furun iyoafofocai un namaima. Un Egipciofo onaintimai cuscacai un mato onaintimaima. Uncai mato ahuusca huaima. ¹⁴Ascacun nan faritifi nan shafan nocoaino man shinantiro. Maton fusiti shafa icaitian un mato finonmani cusca man shinantiro. Ascashon uhuunnoa shinanquin nan shafatan unimayanan man pitiro. Ascano maton funafoanri faritifi un mato shara huani cusca shinancanicai uhuunna ointi aquimapacunacafoma. ¹⁵Ascano nan fusititian siete dia oshatan misi farashati maisi piishcani. Nantiancai maton pushu muran misi faranshati man huatiroma. Nan ratoran futsan na siete dia oshatan misi farashatiya piaiton man potatiro. Afanan mato fu inonma. ¹⁶Ascacun nan fusiti shafa tauí ichanancahuun uhuunna shinanshquin. Na siete dia oshatan ahuun unutani afanan ichanancahuun uhuunna shinanshcaquin. Nan shafa rafucaí tsoan yonotiroma. Manfin picha fustitiroquin nantififain pinonfo.

¹⁷Ascashon nan fusiti shafa man anutiro misi farashati maisiran man huatiro. Nan shafatafin maton yorafo un Egipcio mai anoshon un yoiyoni cusca un ato iyoshquicain. Ascanofin nan shafa man shinantiroquin. Maton funafoanri nan faritifi nan fusiti shafa unimayanan un mato finonmana cusca shinanpacunacafoquin. ¹⁸Nan na oshu nushmancayan rafu tau huaquin misi farashati maisi pifain nan dia catorce fari cai chain nan oshuri dia veintiuno shafata man faricaino misi farashati maisi picahuun. ¹⁹Ascano nan siete dia oshatan misi farashati maton pushu muran huayamacahuun. Ratora futsan nantian misi farashatiya piainocai afanan maton yora itiroma. Ascatan maton caifoma iyamarai maton caifoon misi farashati piashucaí afanan mato caifo Israelifo fu itiroma. Ascano mato anoa nan yora potacahuun. ²⁰Afanan un mato yoi. Nantian ahuara farashatiya piyamacahuun. Nan man raquirá icaino misi farashati maisi fusti man pitiroran, —ishon nocon Ifo Diosin yoini.

²¹Nannori nicatan Moisés Israeli niaiffo ichanan huani ato yoiquin isca huani, —Natian maton yorafo ano fotacahuun nan chashoanun facu cahuashara catoncahuun rutushquin. Ascashon nocon Ifo Diosin noco finonmanaitiancai noco facu iyoafofo namashquima. ²²Ascashon nan chashoanun facu imi cuchan muran fihuu nan fana ahuun anu hisopo ahuun poyan uhuapamashta mutucushon nan cuchan muran nanuhuu. Ascashon nan hisopo ahuun poyan uhuapamashta fishon nan imin pushu caincaiti ocuma rafu yafi amanaonri raishaquin futsahuun. Ascano shafataimacai tsoanshta ato pushu murannoashu chifi cayotiroma. ²³Man asca hua nocon Ifo Diosin nan imi oinquin ahuun oinmati a

fu nai muran icaton yoitiro isca huaquin, “Egipcio ato furun iyoafofo namaitian Israelifo aton pushufoti finonhuun aton furun iyoafofocai namashquinmaran,” ishon Diosin ahuun oinmati a fu nai muran imisi yoishquin.

²⁴Ascacun nocon Ifo Diosin yonoa cusca acahuun. Faritifi nocon funafoya nocon Diosin yonoa cusca non shinanpacunaca. ²⁵Chipo Diosin noco yoiyoni cusca noco mai futsa inain. Nan mai ano non icaitian faritifi nan fusiti shafa nocon funafoyashon non shinantiro. ²⁶Man nanscaitan oinquin maton facufoan mato yocatiro isca huaquin, “¿Ahuuscaimun man iscai fuscain?” ishon mato yocaifoan man ato cumatiro isca huaquin, ²⁷“Non Egipcio mai anoashu oaitian nocon Ifo Diosin nantifi Egipcio aton furun iyoafofo namanitian nantianri nocon pushufoti finonmani nocon furun iyoafofocai namanima. Ascano nan shafatan ano fusaitian chashoanun facu cahuahara non rutunon nocon Ifo Diosi ismafain non fasi unimai noco Egipcio mai anoshon numaniran,” ishon nocon facufo man yoitiroran, —ishon Moisés ahuun caifo niaifo patasharinoafo yoiaino nannori nicacani ratoconun mai chachishon nocon Ifo Diosi cufinyanan ahuunoa yoisharanifo. ²⁸Ascatan Israelifo aton pushu ano fonifo nocon Ifo Diosin Moisés yafi Aarón yononi cuscacoin anonfo.

Egipciofoan aton furun iyoafofo nantifin nai futsunifo

²⁹Ascano nan yamunacahuanaino nocon Ifo Diosin nantifi Egipcio ato furun iyafofo namani. Nan niaifo Faraón ahuun furun non Egipciofoan aton furun nan cunu muran iquimanifo non nantifi Egipcio aton inapan facu iyoafofo nai futsunifo. ³⁰Nantian Faraón non niaifo

patasharinoafo nantifi Egipciofo nan yamunacahuanaino moi futsunifo. Ascashu nantifi aton pushu anoafo aton furun iyoafofo nai futsuafo oincani. Nantificoin fasi oiashcafinin uainifo. ³¹⁻³²Ascano nan yamutan niaifo Faraón ahuun yora futsa nichini Moisés yafi Aarón ihuitanon. Aquí nocoafotian ato yoini isca huaquin,

—Nantifi maton caifofo Israelifo non maton inafoya uhuun mai Egipcio anoashu foriscatacahuun man ua yoca cusca maton Ifo Diosi cufinfain uarifi cufinshocahuun ua numanon, —ishon Faraón yoini.

³³Ascano Egipciofoan shinanquin isca huanifo, —Na Israelifo noco mai anoshon non ato nichiyamaino nantifi non nai futsuiran, —ishon shinannifo. Ascashon Egipciofoan Israelifo yoinifo, —Nocon mai anoashu foriscatacahuun, —ishon ato yoinifo. ³⁴Ascano nantian Israelifoan aton misi farashati maisi fiifain aton misi acamaquishon onihuati muran aton sahuutifo nanushon iyafainnifo. ³⁵Moisés ahuun caifo yonoa cusca Israelifoan Egipciofo ahuara sharafo ato yocanifo. Oro non cuno facafacaitsa yocafain sahuutifori ato yocanifo. ³⁶Nan nocon Ifo Diosin ato shinanmanai cusca Israelifoan ato yocanifo Egipciofoan nantifi ato inanquin cuyo cuanifo. Ascano nan Egipciofo atona iyopaonifo nan ato ahuara chicoinfo Israelifoan ato fianni.

Israelifo Egipcio mai anoashu fonifo

³⁷Ascashu Israelifo pushu rasi ahuun anu Ramsés anoashu Sucot ano fonifo. Seiscientos mil nocofunufu taucoin fonifo. Ainfofo yafi facufocai ato tanan huanima. ³⁸Nantianri caifo futsafori ato fu osifaini fonifo. Ato ina ichaparasiya fonifo. ³⁹Nan Egipciofoan ato nichirisca huaitiancai nan misi farashati maisi Egipcio mai

anoashu fonifo. Tsoancai aton tushu pichatiro inima. Nan samamashtacoin ato nichiaifoanno cai tsoan manatiro inima. Ascashon misi farashati maisi fusti pinifo.

⁴⁰Ascano Israelifo cuatrocientos treinta fari Egipcio mai ano iyopaonifo.

⁴¹Nan cuatrocientos treinta fari cuyoano nan shafatacoin Diosin ahuun yora nan Israelifo Egipciofo mai anoshon ato nichini. ⁴²Ascano nan yamutan nocon Ifo Diosin Israelifo cushusharani Egipcio mai anoashu fosharatanonfo. Ascano nan faritifi Israelifoan nocon Ifo Diosin ato shara huani cusca shinanmisifo.

Diosin oinmati nai ariashu ato finoaintian Israelifo atiro cuscan Diosin ato yononi

⁴³Nocon Ifo Diosin Moisés yafi Aarón yoini isca huaquin, —Un mato finonmafain numa cusca nan shafatan man fusiaino un mato tapimashquin manmain ahuuscatiroquin. Nantian chashoan cahuashara ahuun namicaí mato caifomafoan pitiroma. ⁴⁴Ascano nan maton yonomati mani futsa man ihuini mato fu ipaiyaiton nantian iquisi ahuun foshqui rupa shatucahuun mato cuscara inon. Ascashon mato futan chashoanun facu pitiro. ⁴⁵Nan maton oinmatifo man ato pui inanmisi mato yonoshonatocai mato futan chashoanun facu maton fusititian pitiroma. Nan mato fu iyomisifo maton caifomari chipo mato anoashu ahuun mai ari caashquaiatocai nan yoranricai mato futan chashoanun facu pitiroma.

⁴⁶Nan fusiti shafa pushu fusti muranшон man pitiro. Chifishon piyamacahuun. Nan man piaino chashoanun facu ahuun shao tucuyamacahuun. ⁴⁷Nantifi maton caifo Israelifo fusiaitiancai tsoanshta raqui cayotiroma fusishquima.

⁴⁸Nan ratoran Israelifomafiashu mato fu ichananpai mato fu fusishquin iquisi

aa non nantifi nocofunufu ahuun pushu muran icafo iquisi foshqui rupa shatuyotirofo nan un mato finonmani cuscahuunoa shinanpai nantian mato futan piishquin. Ascashufin nan mato mai anoashu cainni cuscaran itiroquin. Ascan nan ratoran futsan foshqui rupa shatuamacai mato fu fusitiroma chashoanun facu piishquin. ⁴⁹Un mato yonoo cusca maton caifo nan mato mai anoashu cainnifo iyamarai maton caifomafoanri nicacointirofo. Ascan un mato yonoo cusca nicayamainocai mato fu fusitiromaran, —ishon nocon Ifo Diosin Moisés yafi Aarón yoini.

⁵⁰Nocon Ifo Diosin Moisés yafi Aarón yononi cuscacoin aton caifo nan Israelifo nanscacoinnifo. ⁵¹Nan shafatafin nocon Ifo Diosin nantifi Israelifo nan manifoti Egipcio mai anoshon ato iyoniquin.

13 isca huaquin,

²—Nantifi Israelifo maton furun iyoafofo uhuuna ishquin. Ascacun man ato tapimatiro un ato amapaiyai cusca anonfo. Maton inapan facu iyoafofori uhuuna iishquiran, —ishon nocon Ifo Diosin yoini.

³Nannori nicatan Moisés ahuun caifo yoini isca huaquin, —Nocon Ifo Diosin ahuun curushhuunshon mato Egipcio mai arishon ihuua afanan Egipciofoan aton yonomatifo man inonma. Ascacun nan noco ihuua shafa nocoaitian faritifi nan shinancahuun.

Ointiaquimayamacahuun. Nan shafatafin nocon fusiti shafa ipanacaquin. Nan shafatan misi farashatiya piyamacahuun. ⁴Nocon tsainman nan oshu non anonon Abibran non huamisi. Nan shafata oshu Abib nantian non Egipcio mai anoashu caitian.

⁵Nocon Ifo Diosin nocon shunifo yoiyoni isca huaquin, “Un maton mai

fasi sharacoin inain. Nanno nantifin man yopai cusca man ayashquinran,” ishon nocon Ifo Diosin nocon shunifo yoiyoni. Nan mai shara ano Cananeofo non Hititafo non Amorreefo non Heveofo non Jebuseofo. Non nanno nocoaitian oshu Abibtifi non fusitiro nocon Ifo Diosin noco Egipcio mai anoshon iyon i cusca shinanshquin. ⁶Nan siete dia oshatan misi farashati maisi fusti picahuun. Ascano siete dia finoanno fusicahuun nocon Ifohuunoa shinansharashcaquin. ⁷Ascano nan siete dia oshatan misi farashati maisi man piaitian ahuara tushu futsari farashatiya piyamacahuun. Nan man icano nan siete dia oshatan nan farashati maton pushu muran man huatiroma. Nocon mai anorikai man huatiroma. Siete dia oshatacai non farashati oinpaima.

⁸Ascashon nan siete dia oshatan fusititan maton facufo man tapimatiro ahuuscain man misi farashati maisi picain. “Nantian nocon Ifo Diosin Egipcio mai anoshon noco ihuuriscani. Ascacun non misi farashati maisi nantian non pitiro nan noco ihuuriscani cuscan shinantaquiran,” ishon ato yoicahuun. ⁹Ascaino maton mucu non maton fumananquiri cunui cafiscain nocon Ifo Diosin mato yonoa cusca shinanfain ahuun curushhuunshon mato Egipcio mai anoshon iyon i cuscacai man ointiaquimapacununma. Nanfohuunoa yoinonancahuun. ¹⁰Ascacun nan shafa faritifi fusicahuun nocon Ifo Diosin Egipcio mai ano aton furun iyoafofo namaniancai nocon furun iyoafofo namanima. Nan ato finonmanitian. Ascacun nanfohuunoa non shinanon.

¹¹⁻¹²Ascano nocon Ifo Diosin nocon shunifo yoiyoni cusca Cananeofoan aton mai noco inain. Ascacun nan mai ano icaitian Diosin noco yonoa cusca ointiaquimayamacahuun. Maton furun

iyoafofo man Diosi inain ato amapaiyai cusca anonfo. Nantifi mato inapan facu iyoa funufori ahuuna iishiquin.

Nanscacun ointiaquimayamacahuun.

¹³Ascafia maton burropan facu funu iyoa caincun fiishon man chashoanun facu inantiro nan burropan facu funu iyoa mina itiro. Ascano nan chashoanun facu inanpaiyamaquin nan burropan facu iyoa tusho tutucuancahuun nanon. Ascatari maton furun iyoafofohuunshon nocon Ifo Diosi chashoanun facu funu iyoa rutushocahuun nan maton facu numa cusca ismashcaquin. ¹⁴Chipo ua nocon Ifo Diosin mato yonoa cusca man aino maton facufoan oincashon mato yocaquin isca huai, “¿Ahuuscai nocon fusti shafa nocoano man iscatiromun?” ishon mato yocaifoan man ato yoitiro isca huaquin, “Nocon Ifo Diosin ahuun curushhuunshon noco Egipcio mai arishon ihuuni. Non Egipcio mai ano fari ichapacoin Egipciofoan noco curushcain yonopaoni. Non ato yonomatifo icaitian non fasi omitsiscapaoni. Ascano nocon Ifo Diosin ahuun curushhuunshon noco Egipcio mai arishon ihuuni.

¹⁵“Non Egipcio mai ano iyopaonitian nan aton niaifo Faraoncai nocohuun ramapainima. Ascatari nocon Ifo Diosin yoiiai cuscari Faraón nicacasmapaoni. Ascano nocon Ifo Diosin nantian Egipciofo aton furun iyoafofo nantifi namaquin futsani. Aton inapan facu funufo taunifo namaquin futsani. Nanscafin faritifi nocon fusititan non nocon Ifo Diosin nantifin nocon inafu funu taunifo inainquin. Ascafia shon nocon facu iyoafofo non afanan ihuitiro. Ascano nocon facufo aton rututamarocon non chashoanun facu rututiro nocon Ifo Diosi ismashquin nan noco Egipcio mai anoshon namaniran,” ishon maton facufo man yoitiro.

¹⁶Ascacufin nan fusiti shafa nocon onanti cuscaran itiroquin. Maton mucu iyamarai maton fumananqui man cunui futsucun mato onantiro. Nanscarifiaquin nan fusiti shafahuunoo man shinantiro nocon Ifo Diosin ahuun curushhuunshon noco Egipcio mai anoshon iyoni. Nan fusiti shafahuunoo Diosin noco ashoni cusca non ointiaquimapacunacama. Nantifi manifesti anoafuan tapitiro non Diospan yorafocun, —ishon Moisés yoini.

**Coinmanhuan yafi chii
urumanhuanhuunoo**

¹⁷Nan Faraón Israelifo Egipcio mai anoshon nichiaitian nocon Ifo Diosin shinanquin isca huani, —Na maifin Un Israelifo inaincai un ato cayacafi nanno ato iyoaitian Filisteofo mai ano nocotirofo. Nanno nocoafiotian Filisteofoan ato rutupaiyaifoanno ratucani Egipcio mai ano nasotirofo. Ascacun un ato cayacafi iyotamarocon un ato fai futsa iyoshquin. ¹⁸Ascanofin tsoa istaipama ano un ato iyoicaicain nan fai unuhuanhuuri ahuun anu oshin ano un ato iyoicairan, —ishon nocon Ifo Diosin shinanni.

Nan Israelifo Egipcio mai anoashu foaifotian aton ashifo non aton piafori tsomanifo caifo futsa fu rutunanshcaquin. ¹⁹Nantian José nataima ahuun yorafo yoini cusca Moisés shinanquin isca huani, —José ahuun yorafo yoini, “Chipo nocon Ifo Diosin mato numashquin man Egipcio mai anoashu caitian ua shinanchahuun. Nan man caitian uhuun shafo fooshquicahuun mai futsa ano nocoshon nanno uhuun shao mai huacahuun,” —ishon José yoyoni cuscan Moisés shinanni. Ascano Israelifo Egipcio mai anoashu foaifotian Moisés yononi cuscan José ahuun shafo nantifi fonifo.

²⁰Asca nanno Israelifo pushu rasi ahuun anu Sucot anoashu focani. Etam mai ano noconifo. Nan Etam tsoa istaipama cusumunri. Nanno oshayonifo. ²¹Ascano man shafaino nocon Ifo Diosin nai coinmanhuanhuunshon ato tapimani nan coinmanhuan foaiquiri man catiro. Yamuri chii urumanhuan nai murannoo ato oinmani nan yamu urumanhuan foaiquiri man catiroran, ato huani. Ascan shafata iyamarai yamuri fopaicani fotirofoquin. ²²Nan shafatishon coin ato rusoatori ini. Ascaino nan yamutishori chii urumanhuan nai murannoashu ato rusoatori ini.

**Israelifoan ununhuan ahuun
anu Oshin pocufainnifo**

14 ¹Ascatan nantian nocon Ifo Diosin Moisés yoini isca huaquin, ²—Min caifo Israelifo yoihuun mai ahuun anu Pi-hahiroto ano nasoshcaquin. Nan Pi-hahiroto nan mai Migdol yafi ununhuan Oshin nushmancayan ini. Nanno chaimashtari mai ahuun anu Baal-zefón ano man oshatiro. ³Ascaino Faraón shinanshquin isca huai, “Israelifo tsoa istaipaima ano foanfafaicani. Ocuma futsa nan tsoa istaipama futsa unuhuan Oshin nushmancayan Israelifo foanfafaicani. Raquimain caicain tsoacain tapiafoma,” ishon Faraón shinanshquin.

⁴Ascano un afanan Faraón ahuun nomuran curush huamai cusca afanan min caifohuunoo shinanchacai. Matohuunoo nannori shinanquin ahuun ranushumuafoyashon mato mufaini focani mato afanan achishcaquin. Ascafia un acai cusca nantifi yorafoan tapitirofo tsoa futsacai ua cuscara sharama. Ascashon tapitirofo un ahuamamishti huatiro. Nanscacufin

Egipciofoan tapicaniquin unfin Ifo Diosiquin, —ishon nocon Ifo Diosin yoini.

Nan nocon Ifo Diosin ato yononi cusca Israelifoan huanifo. ⁵Nan Egipciofo aton niaifo Faraón nica Israelifo man foafo afanancai tsoan nasoyamaiton nicain. Aa non Egipcio niaifo patasharinoafoanri shinannifo isca huaquin, —iOhuashta! ¿Ahuuscai non Israelifo nichiamun? Afanan nocon yonomatifo iishquimaran, —ishon nannori yoinifo.

⁶Ascano nantian Faraón ahuun taramutifo itishara huani. Ascashon ahuun ranushumuafo yoini ato futan Israelifo muufainshquin atoquei nocoshon ato achinonfo. ⁷Nantian seiscientos taramutiyafo nan fasi sharacapafo yafi taramutiya futsafo Egipciofoan aton taramutifoya Faraón fu fonifo. Ascano taramuti atirifo muran ranushumua niaifofo fonifo. ⁸Nan Israelifocai tsoashta ratunima Egipcio mai anoashu foaifotian. Nocon Ifo Diosin Egipciofoan aton niaifo Faraón ahuun nomuran curush huamani Israelifo mufaitan ato achinon.

⁹Ascano nantifi Faraón ahuun ranushumuafo non caballofo non taramutifo non nan taramuti futsafo muran a fu fonifo Israelifo mufaicani. Nan Israelifo unuhuan cusumunri Pi-hahirof yafi Baal-zefón chaima oshafoanno. Nanno Egipciofo atoquei nocoqui rashquini. ¹⁰Israelifo Faraón yafi ahuun yora Egipciofo chaimashtacunoa fuchitan fasi ratucoinnifo. Ascashon oi ashcafinin nocon Ifo Diosi cufinnifo ato numanon.

¹¹Nanscara oincani Moisésqui ahuun caifo Israelifoan fasi tsain chipunifo. Yoiquin isca huani, —¿Ahuuscai Egipcio mai ano non itiromamun? Anoashu non naino nanno non maitiro.

¿Ahuuscaquimun tsoa istaipama min noco ihuuaquin non nunoashu naanon? ¿Ahuuscaquimun min noco Egipcio mai anoshon ihuuaquin? ¹²Man nonfin Egipcio mai anoshon mia yoiamaquin, “iNoco fucash huayamahuu!” Non tsoan istaipama icashu naacai sharama. Non Egipciofoan yonomatifo natian icaino shara icuanaran, —ishon Israelifoan Moisésqui tsain chipunifo.

¹³Nannori huafiafoan Moisés ato cumani isca huaquin, —Ratuyamacahuun. Nocon Ifo Diosin noco numai cusca nan fusti shinancahuun. Noncai afanan Egipciofoan noco mufainaifotian non ato afanan oinnacama. Nocon Ifo Diosin noco numai cusca man samamashta oincan. ¹⁴Shinanchacayamacahuun. Raqui ichoyamacahuun. Diosifin Egipciofo onaintimai cusca man samamashta oincan, —ishon Moisés ahuun caifofo yoini.

¹⁵Ascashon nocon Ifo Diosin Moisés yoini isca huaquin,

—Afanan ua cufintama min caifofo yoihuun fononfo. ¹⁶Ascano min poquiti unuhuan manaon susohuun. Min susoaino ununhuan pashcanantanaino min non nantifi min yorafoan mai mutotanaino pocufainonfo. ¹⁷Unfin Egipciofoan aton nomuran shinanchacamanicai mato mufainonfo. Nan aton niaifo Faraón non ahuun ranushumuafo non aton taramutifoya non aton caballofo non caballo camaqui camisifori un ahuamamishti huatiro cusca un ato ismai un ahuamamishti huatiro nantififain uhuunoa tapinonfo.

¹⁸Ascacun nan Faraón non ahuun taramutifoya non ahuun ranushumua nan caballo camaqui camisifo un ato onaintimaitian nantian Egipciofoan tapishcani unfin nantifiton aton Ifo Diosiquin. Tsoa futsacai ua cuscara

sharama. Ascashofin ua tapitirofoquin, —ishon nocon Ifo Diosin yoini.

¹⁹Ascano Diosin nannori ato yoiquin anaititanaino ahuun oinmati nan a fu nai muran imisicai afanan Israelifo rucu cashotamarocon ato cachori cani.

Nantianri nan nai coinmanhuan yafi Diospan oinmati ato fu acachori cafoni.

²⁰Ascano nantian nan nai coinmanhuan Egipcio aton ranushumuafo yafi Israelifo nushumancaya ato nastuicoín ato shutirisca huatanainocai Egipciofoan afanan ato ointiro inima.

Nai coinmanhuan faquishcoín itanainocai afanan tsoan Israelifo ointiro inima. Ascafiano nan Israelifoanno cai faquish itamarocon ato ano shafa sharacoin ini. Nan yamutishon Egipciofoan oianfo nai coinmanhuan faquishi huacoin ini. Nantianri nan nai coinmanhuan Israelifo chashashoni oinsharanonfo. Ascanocai Israelifoqui nan yamutishon ato chaimashta ifiashucaí Egipciofo atoqui nocotirofo inima.

²¹Ascano nantian Moisés unuhuan manaonri mushaino samamashta Diosin nihuunhuan fari oaiquirinoashu nihuu curushupacoin nocoriscatanaino ununhuan pashcanan rafutani. Ascano Diosin unuhuan nushmancayan rafu mai mutomariscatani. ²²Unuhuan pashcatanaino ocuma futsa unu cuhuiacua nan cunu cuscaran ini. Ocuma futsari nanscara cuhuiacua cuyacoin ini. Ascano nan unu cuhuiacua rafu nushmancayan Israelifoan mai mutotanaino pocufainnifo.

²³Nanscatanaino Egipciofoan Israelifo mufaintan arifi unuhuan nushmancayan pocufainpainifo. Faraón ahuun ranushumuafo non aton caballofo non nantifi unuhuan nushmancayan Israelifo mufainnifo. ²⁴Nan shafataima chiihuan nai murannoa nocon Ifo Diosin

Egipciofo oiaínno nan Egipciofo afi ranan furo romanifo Diosi ato imai cusca. Nan Egipcio ranushumuafo fasi ratucoincani icaifo cuscacai tsoan tapinima. ²⁵Diosin yonotanaino Egipciofoan aton taramutiyafu nantifi chacana huaqui futsani pacunonfo. Ato catimacoin huani. Ascaiton oincani Egipciofo yoinannifo,

—Non Israelifo achinonma aton Ifo Diosin ato numai. Nansacun noco taramutifo chacana huaiquin. Non Israelifomaquinoashu fononfocahuun non afanan ato achitiromaran, —icashu Egipciofo yoinannifo.

²⁶Ascano nocon Ifo Diosin Moisés yononi isca huaquin,

—Min mucu unuhuan manaon mushanhuun. Min mushaino unuhuan afanan nantio ositanon. Nantifi Egipciofo non aton caballofoya ahuun taramutiyafu nantifi asain futsunonfo, —ishon Diosin Moisés yononi.

²⁷Nan noco Ifo Diosin Moisés yonoai cusca ununhuan manaon mushaino afanan ununhuan nan imisi cuscaracoin itanaino Egipciofo ununhuan cusumunri ichopaifiacanicai tsoan raquishta ichotiro inima. Nocon Ifo Diosin nantifi ato asaquín futsani. Ascano nantificoin nai futsunifo. ²⁸Ascano nan unuhuan muto tanaino nan taramutifoya ahuun ranushumuafo nantifi atoqui mainhuan fupotani. Ascano nantifi Faraón ahuun ranushumuafo na Israelifo mufainafo ato rutupai foafu nanfo asain futsunifo. Tsoashtacai tushunima. ²⁹Ascano Egipciofo asataifoma nan unuhuan pashcatanaino ocuma rafu nan cunu ointsa cuyacoin nan rafu nushmancayan mai mutotanaino Israelifoan pocufainnifo.

³⁰Nan shafata nocon Ifo Diosin Israelifo numani Egipciofoan ato rutunonfoma. Ascano nantian

Israelifoan Egipciofo naafo aton cayafo unuhuan cusumunnoa oinnifo. ³¹Nan noco Ifo Diosin ahuun curushhuunshon Egipciofo nama cusca Israelifoan oincaquin yoinifo isca huaquin, —iAicho! Nocon Ifo Diosin ahuamamishti huatiro, —ishon yoinifo. Ascashon nocon Ifo Diosihuunooa yoisharafain a icoinran huafain nan ahuun oinmati Moisésriffin icoinra huanifo.

**Moisés nocon Ifo Diosi
fanainshoni cuscan**

15 ¹Natian Moisés fu Israelifo nocon Ifo Diosihuunooa shinansharai cusca fanainquin iscanifo,

—Unfin nocon Ifo Diosi fanainsharashonici.

Tsoa futsacai a cuscara sharama. Nantofin nantifi finoncoianquin.

Nantifi Egipciofoan aton caballofo non aton tarumuti acamaqui tsaoafo unuhuan muran man min asamana.

² Unfin nocon Ifo Diosihuunooa fanainquicain.

Nantofin ahuun curushu ua inanfain ua numaquin.

Nanfin uhuun upa ahuun Diosiquin. Nanrifin uhuun Diosiriquin.

Un ahuunooa yoisharafain un nantifi yoi tsoa futsacai uhuun Diosi cuscarama.

³ Nocon Ifo Diosifin noco cushumisiquin.

Futsafoan noco chaca huapaiyaton

nanton ahuun curushhuunshon nocomaquinoa yora chacafo potatiro

noco ahuusca huanonfoma.

Nanton ahuun anufin Ifo Diosiquin.

⁴ Nan Faraón ahuun tarumutiyafo non ahuun ranushumuafu

nocon Ifo Diosin ato ununhuan naquishon

ato asamanaino

Faraón ahuun ranushumuafu

nan niaifu patasharinoafu

nan fasi tapisharafa

nocon Ifo Diosin ato asamanaino

man asain futsuafu.

⁵ Ununhuanun man ato fupoa.

Ahuun noamuran nan toquiri unu

muran pacutiro cusca

man nantifi unu noa muran iqui

futsuafu ica.

⁶ Ifo Diosin minfin min

curushhuunshon

min ahuamamishti huatiro cusca

man oianfo.

Min curushu fasi sharacoin man

oianfo.

Nan noco noicasmaifu min ato

onaintimacoian afanan

ninonfoma.

⁷ Min ato yonoa cusca Egipciofoan

mia nicascamamisifo.

Ascacun min curushu

sharacoinhuunshon min ato

nantifi shatumana

afanan noco ahuusca

huanonfoma.

Min atoqui fasi sinaitian nan shachi

mutocoin ano

yora coatiro cusca min ato

namaqui futsa.

⁸ Min ununhuanqui ashaintaquin

pashcanan huatanaino

nushmancayan mai muto

iriscatanaino

ocuma rafu ununhuan cuhuiauca

nan cunu cuya cuscaran rafu.

Nan rafu nantio rafu

pashcanantana.

⁹ Nan nocon noicasmaifu Egipciofoan

yoiafo isca huaquin,

“Non Israelifo mufaintan non

atoqui nocoshon

- non ato mafo fiatan non
pashcananon.
Nan ayafo cusca ato fiiafain non ato
ashifoan rutunon,” ishon
yoiafo.
- ¹⁰ Minfin nocon Ifo Diosiquin
min atoqui ashaintanaino
unuhuanun ato fupoqui cuyoa.
Unuhan noa muran man iqui
futsuafo
nan min ato asaquin futsaino.
- ¹¹ Nan diosiran ishon rami huafocai
dioscoinfoma.
Afocai mia cuscarafoa.
Tsoa futsacai mia cuscarama.
Min fusti sharacoin.
Mia cuscaracai tsoan
oinyomisima.
Min ahuamamishti huatiro.
Min curushhuunshon ahuara
huamisi cusca oinquin,
“iAira! iOincapon!
Diosin acai cusca fasi
sharacoinran,” ishon non
yoitiro.
- ¹² Min mucu min atoqui mushaino
nan Egipciofo unu muran iquiafo.
Ascano min ato nama nai futsuafo.
- ¹³ Nonfin min yorafoquin.
Min noco numa non afanan
Egipciofoan aton yonomatifo
inonma.
Minfin noco nantishotapiquin
noipacunacaquin.
Minfin noco tapimatiroquin nan
non cai cusca.
Min curushhuunshon mai sharacoin
ano min noco iyoshquin.
Nanno min no fu iishquin.
Min no fu icaitian shara fustisi non
ointiro.
- ¹⁴ Nan min noco iyoai cusca
mani futsafoan nicacani fasi
ratucoinshquicani.
Filisteofori ratucoinshquicani.

- Ascashu aton nomuran fasi
omitsiscashcani.
- ¹⁵ Nan Edom ano icafo
aton niaifofo fasi
ratucoinshquicani.
Moabfo aton niaifofori ratucoincani
taritari ishquicani.
Nan Cananeofori fasi musucani
nantian fasi ato fuso pashicoi
iishcani.
- ¹⁶ Ascano fasi ratucoincani.
Min curushhuunoa nicacani
nantifi manifoti miqui
musucoincani.
Aicho, Ifo Diosin, min noco ihuia
non min yorafo inon.
Ascano miqui musuaifoanno
non aton mai ano finoaintocai
noco ahuusca huashquicanima.
- ¹⁷ Aicho Ifon, min noco mai sharacoin
catonshona
non nanno iishquinon.
Nanno machifo ano
minrifi min noco fu nanno
iishquin.
Nan mai sharacoin
min noco oni huashoni
min noco inanno nocona iishquin.
- ¹⁸ Ifon Diosin minfin nantifi
iquipacunacaquin,
—ishon Moisés futan Israelifo nocon Ifo
Diosi fanainshonifo.

María nocon Ifo Diosi fanainshoni cuscan

- ¹⁹ Ascano Israelifoan ununhuan
pocufainnifo nocon Ifo Diosin yonoo
cuscan mai mutotanaino nantifiton
pocufainnifo. Ascano Faraón ahuun
caballofo non ahuun taramutifo non
ahuun ranushumua nan taramutifo
muran fomisifo Israeli cachori
pocufaipaiafoan nocon Ifo Diosin
yonoo cuscan ato unuhuanun fupoqui
futsaino asain futsunifo. ²⁰ Ascano
nantian Aarón ahuun chipi ahuun anu

María nantorifi Diospan tsain ahuun yorafo yoimisi. Arifi Diosiqui fasi unimacoinquin ahuun manuti ahuun anu pandereta manuaino nantifi Israelifo ainfofoan a futan aton manutifo manuaino nantifi mononifo.

²¹Ascano María fanainquin iscani, —Nocon Ifo Diosin min nantifi finoncoian. Tsoa futsacai mia cuscarama. Egipciofo yafi aton caballofo unuhuan muran min ato potaino nantifi asain futsuafo. Nocon Ifo Diosin minfin noco numaquin, —icashu María fanainni.

Unu mocacoin ano noconifo

²²Ascano Moisés ahuun caifo nan Israelifo ununhuan ahuun anu oshin anoashu tsoa istaipama ano ahuun anu Shur ano ato iyoní. Nanno osha rafu non fusti foanfafaifiaquicai tsoan anoa unu fuchinima. ²³Nan mai ahuun anu Mara ano nocoshon unu fuchifiafo fasi mocacoin ini. Tsoancai ayatiro inima. Ascashon nan mai anunifo Mara. Onicoinnin tsainman mocacoinran ishon anunifo.

²⁴Ascano nantifi Israelifo Moisésqui fasi sinacoincaquin aqui tsain chipunifo. Ascashon yoinifo, —¿Natianmun non raquia unu ayaicain? —huanifo.

²⁵Nantian Moisés nocon Ifo Diosi cufinquin isca huani, —¿Ifon, unmain ahuusca huatiroquin? Ua tapimahuun uhuun caifoan unu ayanonfo, —ishon nannori cufiainno. Nantian Diosin Moisés ihui poyan ismani. —Nan fishon unu muran potaino unucái afanan moca itamarocon fata sharacoin ishquiran, —ishon nocon Ifo Diosin yoini. Diosin yoia cuscan Moisés ihui poyan unu muran potaino unu fianananriscatani afanancai moca inima.

Ascano nannoshon nocon Ifo Diosin Israelifo yoiquin isca huani ahuun

tsainmain nicacanicain oinshquin nannori ato tapimani, ²⁶—Nan un mato yonoai cuscan ua man nicasharaitocai un mato nan Egipciofo pau futsa futsatapafo fuchimamisi cuscacai nan pau man fuchishquima. Unfin maton Ifoquin. Un mato caya huamashquiran, —ishon nocon Ifo Diosin Israelifo yoini.

²⁷Ascano focani nan mai ahuun anu Elim ano noconifo. Nanno pozomua mucu rafuti nushman cayanoati ini. Ascano setenta shufofo nannori nia ini. Nantian nanno unu cusumunri Israelifo iyonifo.

Diosin misi fatan cuscaran ahuun anu manán nai muranshon Israelifo nirishashoni

16 ¹Ascano nantifi Israelifo Egipcio mai anoashu foafotian oshu fusti finoanno Elim anoashu tsoa istaipama mainfin uhuapacoin ano noconifo. Ascashon nannoshon anunifo Sin. Nan Sin Elim chaimashta nan nushmancayan rafu Sinain ini. ²Nanno nan mainfin uhuapan anoshon nantifi Israelifoan Moisés yafi Aarónqui tsain chipunifo. Fasi atoqui sinacaquin. ³Ascashon Israelifoan yoinifo isca huaquin,

—Non Egipcio mai anoashu oyamashara icuana. Nannoshon non pisharamisi. Ascafia nuno man noco ihuua non nunoashu fonin nanon. Diosin noco Egipcio anoshon nama shara icuanaran, —ishon Israelifoan Moisésqui tsain chipunifo.

⁴Nannori yoiainfoan oinquin nocon Ifo Diosin Moisés yoini isca huaquin, —Natian un nai muranshon mato tushu inain. Shafatifi man yopai cusca min caifofoan nan tushu finonfo. Ascano un atohuunoa tapipai ratotomain ua nicasharaiquin. ⁵Ascasho ato yoihuu nan dia viernes nan fimisifo finonmafain paratamacoin finonfo.

Ascano nan dia sabado afanan finonfoma, —ishon nocon Ifo Diosin Moisés yoini.

⁶Nannori nicacatan Moisés futan Aarón Israelifo yoini isca huaquin, —Na yatafin man tapicain tsoamain Egipcio mai anoshon mato ihuuaquin. Nonmaquian nocon Ifo Diosifin mato ihuuaquin. ⁷Ascano funamari nocon Ifo Diosi fasi sharacoincun man oincai. Ascashon man tapitiro Diosifin no fu icaquin. Ascafia man aqui tsain chaca huai cusca nocon Ifo Diosin man mato nican. Ascan noncai ahuama. Man shinan man nocoqui tsain chipuan. Mancai nocoqui tsain chipuama Diosiquifin man tsain chipumisiquin.

⁸Icon man tsain chipuai cusca nocohuunoacai man tsain chipuama. Noncai ahuama. Nocon Ifohuunoafin man tsain chaca huamisiquin. Man tsain chaca yoimisi cuscafin nantifi Diosi man nicamisiquin. Ascacun na yatapacu mato nami inain funamarifin mato misi niriashoin. Asca huaino man tapitiro nocon Ifo Diosin na tushu mato inanran, —ishon Moisés ahuun caifo yoini.

⁹Ascano Moisés ahuun ochi Aarón yoini isca huaquin, —Ochin, nocon caifo nantifi ichananhuashon afanan ato yoihuu isca huaquin, “Man nocon Ifoqui tsain chaca huafia. Natian aficoín mato cumai oa man nicanon. Nantifiton nicacahuun,” —ishon ato yoihuu Moisés Aarón yoini.

¹⁰Ascano Aarón ato yoiaino tsoa istaipama nan mainfin uhuapahuuri oianfo nan nai coinmanhuan ato iyoaino nan muran nocon Ifo Diosi chashatanaino nantifiton oinnifo. Ascaracai tsoa oinyomisima.

¹¹Nantian nocon Ifo Diosin Moisés yoini,

¹²—Uqui tsain chaca huaifo cuscan mun nican. Nan uhuun tsain ato yoihuu

isca huaquin, “Na yatapacu un mato nami inain. Ascashon funamari un mato misi inain. Piashu man mayan sharanon. Ascano man tapishquin unfin mato Ifo Diosiquin,” ishon nannori ato yoihuun, —ishon Moisés ato yononi.

¹³Ascano nan yatapacuri Diosin Israelifo icano coma ichapa rasi fumai nanno pacui futsunonfo. Ascano iyoconaino Israelifo icano nifimanhuanun mai muchana huai. ¹⁴Ascano chipo nifimanhuan shinanno nan misi cuscaran uhuapamamishti pasnanmishti ichapacoin mai ano pacuafo Israelifoan fishon piishquicani. ¹⁵Ascarafocai tsoan oinyomisifoma Israelifo afi ranan yocanonannifo, —¿Naafo mun ahuuquin? —icashu yocanonannifo.

Ascafoan Moisés ato yoini, —Na tushufin Diosin mato inanquin. ¹⁶Diosin yoiquin isca huani, “Nan pushutifain nan yopai cusca finonfo. Nan yorafotiton litro rafu fitiroforan,” —ishon Moisés ato huani.

¹⁷Nannori nicacatan Israelifoan fii focani fonifo. Atirififain paratama fiaino atirififain ichapama shara finifo. ¹⁸Nan yora paratama anoshon paratama fifiafo tushutama nan yora ichapama sharafoan fiafo atona icoini.

¹⁹Ascatan man fiafoanno Moisés ato yoini isca huaquin, —Na tushu piquin tushuhuayamacahuun iyoconaino man pitiromaran, —ishon ato Moisés yoini.

²⁰Nannori ato yoifiano atirifoan nicatama nan tushu huafo mucunifo shafa futsa iyoconaino pipaiquin. Ascano funamarishta oianfo nan tushu huaitafo muran shunanhuanrasi ichapacoin ini. Fasi shuna tsopi tsopi iqui futsui. Fuputapaiquin a muran shutuafo fasi pisicoín oin Moisés ahuun caifo Israelifoqui sinacoinni.

²¹Ascano funamaritifi nan yopaifo cusca Israelifoan nan pushutififain nan

misi cuscaran tushu finifo. Ascano fari isinnaino nan tushu misi cuscaran fari tsacaino nan misi cuscaran afain futsuacai tsoan afanan fitiro inima.

²²Ascano nan viernestifi fasi paratamacoin iquisi fitirofo ini. Nan tushu nocon Ifo Diosin ato nai muranshon niriashoaiton nantifiton nan litro rafu fitamarocon iquisi litro rafu non rafuri finifo. Ascano nanfo oinquin niaifo patasharinoafaoan Moisés yocanifo isca huaquin, —¿Ahuuscaimun na cuscarafu iscaiquin? —ishon yocanifo.

²³Ascaiton Moisés ato cumani, —Nocon Ifo Diosin yonoafin funamari sabadoaino tsoan yonotiromaquin.

Funamaricai non ahuara futsa huaima. Nonfin nocon Ifo Dioshuunofa fusti shinaincai. Non shafatifi yonomisi cuscacai non huayoima. Funamarifin non tunutiroquin. Ascano na shafata non pipaiyai cusca tsoi yamaraquin iquisi non pichatiro. Ascano ahuara tushuaiton mucucahuun funamari pishcaquin, —ishon Moisés ato yoini.

²⁴Ascano nan Moisés ato yonoa cusca nan aton tushu tushuaiton mucuafo iyoconaino shara ini. A muran shuna iyamacain pisicai afanan tohuunima.

²⁵Ascashon Moisés ato yoini,

—Nan tushu man mucuitafo na shafata picahuun. Na shafatacai nocon Ifo Diosin noco nai muranshon tushu niriashoima. Na shafatafin non Diosihuunofa shinanyanan non tunutiroquin. ²⁶Nan osha mucu fustiti non mucu foshca fustiti non tushu fitiro. Sabado fusti non tunutiro. Nan shafatacai nocon Ifo Diosin mai ano mato tushu niriashoimaran, —ishon Moisés ato yoini.

²⁷Moisés ato yoia cuscacai atirifoan nicatama sabadoaino nan tushu misi cuscaran funafiaquicai tsoan fuchinima.

²⁸Ascaiton oinquin nocon Ifo Diosin Moisés yoini,

—¿Ahuutiaca imun na yorafoan ua nicacaniquin? Un ato yoia cuscacai tsoan ua nicapaima. ²⁹¿Tapiafomamun un semanantifi osha fusti ato tunumanaiton? Nanscacufin tunutitian icataima un ato tushu ichapa nai muranshon ato niriashoicai tunuti shafa tsoan tushu funanonfoma. Ascano tunutitian icataima iquisi ichapa fitirofo. Ascancocai nan shafata raqui fotirofoma ato tushu funashcaquima, —ishon nocon Ifo Diosin yoini.

³⁰Nannori nicacatacai tsoan sabado yononima. Nantififain tununifo.

³¹Ascano Israelifoan chipo nan tushu Diosin ato nai muranshon niriashoan fimisifo anunifo manán huanifo. Nan manán fana cilantro ahuun ushu ointsa. Nan misi fata fonaya osia mutsa ini.

³²Ascashon chipo Moisés Dioshuunshon ahuun caifo yoini isca huaquin, —Nocon Ifo Diosin ua yonoa isca huaquin, “Nan litro rafu manán fihuu. Fishon motica muran nanushon mucuhuun. Ascano chipo maton funafoan oinshquinonfo. Un mato Egipcio mai anoshon ihuatian un mato pimai cuscan nanfoanrifi ointiroforan,” —ishon nocon Ifo Diosin ato yonoa cuscan Moisés ato yoini.

³³Ascano Moisés ahuun ochi Aarón yoini,

—Motica uhuapa fihuu. Nan litro rafu a muran manán nanushquin nocon funafoan chipo oinshquinonfo. Ascano nocon Ifo Diosin noco Egipcio mai anoshon iyoni tsoa istaipamano noco Ifoan noco pima cusca oinshquinonfo. Nan oiainfoanno nocon Ifo Diosin noco shara hua cusca ointiaquimanonfoma, —ishon Moisés Aarón yoini.

³⁴Nocon Ifo Diosin Moisés yoia cuscan Aarón casho muran nanuni. Nan nocon Ifo Diosin ahuun tsain ato yononi cusca ato cunushoni nanrifi Aarón casho

muran nanuni. Ascashon chipo Diosi fu tsainti pushu muran huani.

³⁵Nantian cuarenta farin nocon Ifo Diosin Israelifo manán pimapaoni nan Canaán mai ano nocoalfotian. Ascashon nan Canaán mai ano nococashon ato maufo fananifo. Fanashon piishcaquin.

³⁶Ascano nan manán a muran nanuafu anunifo gomeran huanifo. A muran litro rafu cuana iquitiro ini.

Toquirininhuan murannoashu unu afani

17 ¹Ascano nocon Ifo Diosin ato yononi cusca nantifi Israelifo tsoa istaipama ano ahuun anu Sin anoashu funaiquima shara foanfafaicaní. Chipu Refidim mai ano noconifo. Nanno unu yamacoin ini.

²Ascano nantian afanan Moisésqui Israelifo sinacaquin tsain chipunifo yoiquin isca huanifo,

—Moisés, noco unu ayamahuun, —huaifoan.

—¿Ahuuscai uqui man tsain chipufafainnimun? Uncai ahuamafinquin. Non yopai cuscafin nocon Ifoan noco ashoshquiquin. Mancai nocon Ifo Dios icoira huama. ¿Man Diosi nocoqui sinamapaimun? —ato huaiton.

³Afanan Israelifoan fasi nomicoíncaquin Moisésqui sinacaquin aqúi tsain chipunifo,

—¿Ahuuscaimun min noco Egipcio mai anoshon nuri noco ihuuaquin? Natian nocon facufo non noco inafoyari non nantifi nomi nai futsunon, —ishon Moisésqui sinacaquin nannori yoinifo.

⁴Sinaifoan oinquin Moisés nocon Ifo Diosi fasi cufini. Yoiquin isca huani,

—¿Ifon, natianmun un ahuuscatiroquin? Uhuun caifo man uqui itisharafo ua toquirinin tsacaquin rutushcaquin, —ishon nannori Moisés nocon Ifo Diosi cufini.

⁵Cufinquin asca huaiton nicaquin

nocon Ifo Diosin cumani isca huaquin,

—Niaifo patasharinoafu nan toquiri uhuapa machi Horeb ano ato iyotahuun. Nan min poquitinin min unu Nilo tsacaita cusca nan min poquitiri fotahuun. ⁶Nannoshon nan machi Horeb anoshon un mia manaicai. Min poquitinin na toquiri uhuapa tsacahuu. Min tsacaino toquiri murannoashu unu afanon nantifi min caiffoan ayanonfo, —ishon nocon Ifo Diosin Moisés yononi.

Ascano nan niaifo patasharinoafu ano ointaifi nocon Ifo Diosin yonoai cusca Moisés huani. ⁷Nan unu afataima Israelifoan Moisésqui tsain chipuaifo cusca Moisés nan mai ano anuni Meriba. Asca huatan Israelifoan yoinifo, —¿Nocon Ifo Diosi no fu ica iyamaraimun no fu icama? —ishon nannori yoinifo. Nan Israelifoan nocon Ifo Diosiqui tsain chipunifo. Nannori icaifoan oinquin nocon Ifo Diosin atoqui sinani. Ascano afanan Moisés na mai anuni Masahran huani.

Israelifo yafi Amalecitafo rutunannifo

⁸Ascatan Israelifo nan mai Refidim ano noconifo. Nanno Amalecitafo atoqui noconi ato rutupai fucani. ⁹Ascaiton oinquin Moisés nan nocofunu ahuun anu Josué yoini isca huaquin,

—Nocon caifo nocofunufo catonhuun. Ato iyotashquin Amalecitafo fu rutunanonfo. Funamari un machihuan mamaqui caiquin Diosin ua yonomisi cusca nan poquiti un tsoimai cairan, —ishon Moisés yoini.

¹⁰Ascano nan Moisés yoia cusca Josué ahuun caifofo atirifo catonpacuni. Nantian Amalecitafo Israelifoqui funifo ato rutushcaquin. Nan Amalicitafu fuaifoan oincani Moisés non Aarón non Hur non afo machi mamaqui fonifo nannoshon Upa Diosi cufi focani.

¹¹Ascashon Moisés ahuun mucu rafu nai ari mushaino Israelifoan Amalecitafo ato rutuquin shuhuunnifo. Ascano Moisés ahuun poyan rafu atsanaquin fipapacufoannaino Amalacitafoan Israelifori ato rutuqui shuhuitanifo.

¹²Ascano Moisés ahuun poyan rafu atsanaiton oinquin Aarón futan Hurpan toquiri uhuapa fushonifo Moisés acamaqui tsaonon. Ascano Moisés tsao ano Aarón Moisés poyatani atsananonma. Ascano Hurpanri Moisés ahuun poyan ocuma futsa poyatani atsananonma. Nan fari caitishon ahuun poyan rafu nai ari Moisés mushan huani. Nannorimain nocon Ifo Diosi cufiainno Moisés atsananonma. ¹³Ascashon Josué futan ahuun caifo Israelifoan Amalecitafo ashifoan ato rutunifo. Nan ato rutuquin tushuhuafoti Amalacitafo ichonifo.

¹⁴Ascano nocon Ifo Diosin Moisés yoini isca huaquin, —Nan rama man aca cusca cunuahuun. Ascano Josué ato yoinon nan nicacashu ointiaquimanonfoma. Chipu un nantifi Amalecitafo cuyoqui futsashquin tsoancai atohuunao shinannacamaran, —ishon nocon Ifo Diosin yoini.

¹⁵Nantian Moisés toquirifo putsainini anoshon Diosi cufinshquin. Nan toquirifo putsainini anoshon Moisés anuni isca huaquin, —Nocon Ifo Diosin Amalecitafo rutufafainshquin. Nocon Ifo Diosifin nocon bandera cuscaraquin. Ahuunshon nantifiton tapitirofo nonfin ahuun yorafaquin. Ahuunshon non futsafo finontiro. ¹⁶Nocon Ifo Diosin icano uhuun mucu rafufin un nai ari mushashon un nocon Ifo Diosi cufian nan noco noicasmaifo non finonon. Non ato rutufain non ato ichoquin futsan afanan noco ahuusca huanonfoma. Ascano nocon Ifo Diosin Amalecitafo ato rutuquin cuyononfo, —ishon Moisés yoini.

Jetro ahuun raisi Moisés oin cai cani

18 ¹Ascano nocon Ifo Diosin Moisés yafi ahuun caifo Israelifo ato ashoni cusca ato Egipcio anoshon iyonni cuscari Moisés ahuun raisi Jetro nicani. Nan Jetro ahuun caifofo Madián anofo aton Ifo Diosi cufinshomisi ini. ²⁻³Ascano Moisés ahuun ahuin yafi furun rafu ahuun raisi pushu ano ato nichini. Moisés furun futsan ahuun anu Gerson. Ascashon Moisés yoini isca huaquin, —Un icanocai uhuun maima. Uhuun caifoma fu un ica. Nanscacufin uhuun facu ahuun anu Gerson un huaicai. ⁴Uhuun facu futsa ahuun anufin Eliezerquin. Nan uhuun upan ahuun Diosifin uarifi numaquin Faraón ua non uhuun caifofoya rutupaifiaiton Diosin noco numa shara noco rutunonfoma. Nanscacufin uhuun facu un nannori anuaquin Eliezeran, —ishon Moisés yoini.

⁵Ascano chipu Moisés ahuun ahuin non ahuun facu rafu non ahuun raisi non afo tsoa istaipama mainfin uhuapa ano Moisésqui fonifo. Nanno chaimashta machi ahuun anu Sinaí. ⁶Aqui nocoataima Jetro ahuun raisi Moisés tsain fomani. Ascashon yoiquin isca huani,

—Unquian min raisi un non min ahuin non min facu rafu non miqui nocoicairan, —ishon cunu fomani. ⁷Ascatan Moisés atoqui noco caní. Ahuun raisiqui nocotan tutipacucahuani. Nan aton fuyamisi cusca Moisés ahuun raisi tamوقي tsoani. Ascatan yoinonansharatan Moisés ahuun pano pushu muran iquifainnifo. ⁸Nan muranshon nocon Ifo Diosin ato ashoni cusca Moisés ahuun raisi Jetro yoipacuni. Nocon Ifo Diosin atomaquinoa Faraón yafi Egipciofo omitsisca huani cusca yoifain aa non

ahuun yorafo nan focanashu
omitsiscanifo cusca yoifain nocon Ifo
Diosin ato numani cuscari ahuun raisi
yoipacuni.

⁹⁻¹⁰Nannori ahuun raisi yoiaiton
nicain fasi unimacoinquin, —iAicho!
Nocon Ifo Diosin mato fasi shara
huamisi. Ascashon mato numani niaifo
Faraón futan Egipciofoan mato ahuusca
huanonfoma. Nocon Ifo Diosin fasi
sharanan ishon nantifi yorafoan
yoipacunonfo. ¹¹Nan cacapaimisi
Egipciofoan mia non min yorafo chaca
huapaoni. Nanscacun nocon Ifo Diosin
ato onaintimana afanan mato
omitsiscamanonfoma. Ascacun natianfin
mun tapiaquin ahuara futsafocai
Dioscoinfoma. Nocon Ifo Diosin nantifi
finoanran, —ishon Jetro yoini.

¹²Nannori yoitan Moisés ahuun raisi
Jetro ina rutushon coani nocon Ifo Diosi
ismashquin arifin ahuun Diosin yoiái
cusca aashquin. Ascano ahuara futsafori
Jetro Diosi inan nan ahuun Ifo
ismashquin. Ascano Aarón yafi Israelifo
non aton niaifo patasharinoafori Moisés
yafi ahuun raisi Jetroqui funifo ato
futan piishcaquin. Diosi ointaifi ato
futan pinifo.

**Moisés niaifo futsafo catonni a futan
yorafo yoisharanonfo**

¹³Iyoconaino Moisés tsao ano ahuun
caifofo aqui funifo nan ahuara chaca
finoanfo cusca iyamarai
fochishmanantananni cusca yoi fucani
Moisés ato yoinon ahuuscain
atirofoquin. Nan shafatishon aqui funifo
ato yoisharanon. ¹⁴Ahuun raisi Moisés
ahuun caifofo ashoai cusca oinquin
yoiquin isca huani,

—¿Raisin, ahuuscaimun min yorafo
min ato isca huashoicain? ¿Ahuuscai
mirus fusti min yorafo shafatisho ato
yoimun ratofomain icon iyamarai

iconma afanan
fochishmanantananonfoma? —ishon
yocaiton.

¹⁵—Nocon Ifo Diosin ato amapaiyai
cusca uhuun caifofoan tapipaicani.
Ascashu uqui shafatishon fuaifoan un
ato tapimani. ¹⁶Nanfoan nannorisi
shinanyamacani uqui fucani nan
shinainfo cusca ua yoi fucani. Ascano ua
yoiainfo nicaquin Diosin ato yosipaiyai
cusca un ato yoifain noco yonoa cuscari
un ato tapimai. Ascano ratofoanmain
cayacafi shinaincain un nannori ato
yoimisiran, —ishon Moisés ahuun raisi
yoiaiton nicaquin.

¹⁷Ahuun raisi Jetro cumani, —Min
acai cuscacai sharama. ¹⁸Min ascaino
min non min yorafori fasi atsanatirofo
mancai afanan tunutiroma shafatishon.
Min ato ashoai cuscacai mirus fusti min
atiroma. Yora ichapafo miqui
shafatishon fufafaincaini. Min ascainocai
min afanan tunutiroma. ¹⁹Un mia
yoisharapaiyai cusca ua nicasharapun.
Diosin mia shinansharamapainon. Min
yorafoan Diosi yocapaiyai cusca mia
tapimai fuafo. Ascacun min Diosi
cufitiro ato cumasharashquin. ²⁰Ascano
Diosin ato tapimapaiyai cusca min ato
yoifain ato yonoai cuscari min ato
tapimafain nan isharatirofo cusca ato
tapimafain Diosin ato amapaiyai cuscari
min ato tapimatiro.

²¹Ascfia nanno min yora nocofunufu
mapo sharayafo isharamisifo catonhuun.
Nan Diosihuunua shinansharamisi
catonhuun. Ascatan a pui ichapa
fipaiquin futsafo paranmisi cuscarafu
catonyamahuu. Nan isharamisifoti ato
catonhuun. Nanscarafu maton yorafo
Diosihuunshon tapimamisifo inonfo.
Futsanfoanri mil yorafo tapimamisi
icaino futsanfoan cien maton yorafo ato
tapimamisi icaino futsanfoan cincuenta
aton tapimamisi icaino futsafoanri

maton yorafo mucu rafuti tapimamisi inonfo. ²²Ascano nantishotapiquin mato yorafoan nannorisi shinanyamaifoan nan min catoanfoan Dioshuunshon ato yoitiro ratotomain cayacafi shinaincai. Ascafia futsafoan ato yoiyai cusca tapiyamaino mia tapimatirofo minfin min Upa Diosi yocatiroquin ato tapimasharashquin. Nan ahuafo samamashta tapitiro nanfoan ato yorafo yoitiro tapisharanonfo. Min asca huaicai min funa atsanatiroma. Nanfoan mi futan acaifoanno. ²³Un mia yonoa cusca nanscari huaquin Diosin mia yonoaino miqui shafatifi fuaifoan min tunutiro ato yoisharashquin. Min ato yoiyai cusca unimacatan ato pushu ano nasoshquicaniran, —ishon Jetro ahuun raisi Moisés yoini.

²⁴Nan ahuun raisi yoiyai cusca Moisés nicatan nanscacoín ani. ²⁵Ascatan nan ahuun mai anoa Israeli nocofunun mapo sharayafo yafi nan isharamisifo Moisés catonni ato yorafo ato tapimamisi inonfo. Futsafo mil yorafo aton tapimamisi icaino futsafo cien yorafo aton tapimamisi icaino futsafo cincuenta yorafo aton tapimamisi icain futsafo mucu rafuti Israelifo ato tapimamisi Moisés ato catonni nan Diosin ato yoipaiyai cusca ato tapimanonfo.

²⁶Nantishotapiquin aton yora Israelifo nicanifo Diosin ato yoipaiyai cusca ato tapimanonfo. Nan ahuafo nicacashon samamashta tapitirofo nanfoan aton yorafo yoini ratotomain cayacafi shinaincain. Ascatai ratotomain ahua chaca tapitimani tapipaicain nanscarafohuunoa Moisés ato tapimani.

²⁷Ascano chipo Moisés ahuun raisi Jetro ahuun mai ari cataima yoini, —Raisin, natian uhuun mai ano mun nasopairan, —ishon yoini. —Ai. Catahuun raisin, —Moisés huani. Asca huatan Jetro ahuun mai ari nasoni.

Israelifo tsoan istaipama ano ahuun anu Sinaí noconifo

19 ¹Ascano Israelifo Egipcio mai anoashu fonifo oshu rafu non fusti finoin focani. Nantian tsoan istaipama ano noconifo. Ascashon nanno anunifo Sinaíran huanifo. ²Nan Refidim anoashu focanashu machi Sinaí tunanmanri noconifo. Ascashu nanno iyonifo.

³Nannoashu Moisés machi mamaqui mapuni Diosi fu tsainshquin. Ascano nocon Ifo Diosin machi mamaquishon Moisés cunashon yoiquin isca huani, —Maton caifofo Jacob ahuun funafo Israelifo. Min ato yoitiro isca huaquin, ⁴Un Egipciofo acai cusca man man oian. Nan tutupan ahuun facu ahuun catu camaqui iyotiro cusca huaquin un mato iyoa man ahuuscanonma. Unfin mato uqui ihuuaquin. ⁵⁻⁶Un mato yonoa cusca man nicasharafain un mato yoiyoni cusca man nicacoiainton un mato cushushara. Un mato cushusharai cuscacai un mani futsafo huashquima. Manfin uhuun yoracoinfo ishquicain. Unmain mato cushusharaiton. Un matohuun fasi noi. Nantifi mai uhuunafiashu marifi man uhuun yorafo ishquin. Nantifi min yorafoan uhuun tsain mani futsafo tapimafain uhuun ato cufinshomisifo man itiro. Un mia yoiyai cusca min caifo tapimahuun, —ishon nocon Ifo Diosin Moisés yononi.

⁷Ascatan Moisés machi tunanmanri fotoni ahuun caifo aton niaifofo patasharinofo nantian ato ichanan huani nocon Ifo Diosin yononi cusca ato tapimashquin. ⁸Nannori nicacatan cumaqin isca huanifo,

—Nocon Ifo Diosin noco yonoa cusca nantifi non ashquinran, —ishon yoinifo.

Nan yoiyai cusca nicatan Moisés nocon Ifo Diosi yoini. ⁹Ascashon afanan

nocon Ifo Diosin Moisés yoini isca huaquin, —Un matoqui nai coin cushtocoin muran oshquin un mia yoiái cusca min caifofo nicashon mia icoinra huapanonfo, —ishon nocon Ifo Diosin Moisés yoini. Ascan ahuun yorafo yoiáfo cusca Moisés ahuun Ifo Diosi yoini.

¹⁰—Natian min yorafoqui catahuun.

Ascashon ato yoihuu natian yafi iyoconaino itisharanonfo ua nicasharafain aton sahuutifo patsanonfo. ¹¹Osha rafu finontan iyoconaino itisharacoinonfo un machi Sinaí ano un atoqui fotoi cai nantififain ua oinonfo. ¹²Ascano ato yoihuu nanno fusti ninonfo naashcaquima. Ascatai ato yoihuu isca huaquin, “¡Oinfaín! Un mato yoiái cusca machi chaimashta foyamacahuun. Ascatai machi tunanmanri inayamacain machi rusoaton niyamacahuun. Nan machi rusoaton nia yora naashquicani.

¹³Ascatai nan yora machiqui mupiaiton toquirinin tsacatirofo iyamarai pinyancafo naashquin. A ato rutuafo naafo muyamacahuun. Nan yora iyamarai ina na machi ano niashucaí afanan nitiroma. Ascano inapan ahuun masho manuti fasi chaan chaan acaino man machi tunanmanri futirotan,” ishon ato yoihuu, —nannori nocon Ifo Diosin Moisés yononi.

¹⁴Ascano Moisés machi tunanmanri fotoni Diosin yonóa cusca ahuun yorafo tapimaniyoi. Ascashon ato itishara huamani Diosi nicanonfo. Itisharacatan ato sahuutifo patsanifo. ¹⁵Ascatan afanan Moisés ato yoini isca huaquin, —Itisharahuacahuun osha rafu finoan iyoconaino nocon Ifo Diosin mato fu tsainshquin. Ascano mato ahuinfo fu iyamacahuu, —ishon Moisés ato yoini.

¹⁶Nan osha rafu finoanno iyoconaino nan funamarishta fasi turui furanfafaíntan fasi cana piishi

furanfafaíni. Ascano nai coinmanhuan murannoashu Upa Diosin machi mamaqui fotoni. Nantianri manuti nai murannoashu achacoin manuni chaan chaan iquin fasi isininpatanaino nantifi Israelifo taritaricani ratucoinifo.

¹⁷Ascano Moisés aton pushufo anoshon ahuun caifo Israelifo ato machi chaimashta iyoni nocon Ifo Diosiqui nocoicaquin. Ascano machi tununmanri nantifi ninifo. ¹⁸Diosin chiihuan muran atoqui fotoni. Ascano coinmanhuanun nan machi Sinaí fuponi. Nan mau coai ointsacoin coinmanhuancoin ini. Nantifi nan machi fasi nayanaiyaini.

¹⁹Nantianri manutifo nai ariashu fasi achacoin chaan chaan ini. Ascano Moisés nocon Ifo Diosi cunani. Ascaiton nocon Ifo Diosin cumaiton nicafo nan nai turuica nicatsaton cumani. Ascano nantian ahuun oi nicanifo.

²⁰Nantian nocon Ifo Diosin machi mamaqui fotoni. Nannoshon Moisés cunani aqúi canon. Nan cunaino Moisés machi mamancaya cani Diosi yoiái cusca nicai cai. ²¹Ascashon nocon Ifo Diosin Moisés yoini isca huaquin, —Min yorafo yoihuu nuri funonfoma ua oin fupaicani. Nuri oashu nai futsutirofoquin. ²²Nan yorafoan aton yorafo cufinshomisifo nan u fu tsainmisifo yoihuu natian ua cufinonfo un ato amapaiyai cusca fusti shinanonfo. Ascayamaífoan un atorifi namashquinran ishon ato yoihuu, —ishon nocon Ifo Diosin Moisés yoini.

²³Nannori nicanan Moisés nocon Ifo Dios yoini isca huaquin, —Min ua yoiíta cusca un ato ismaita rani nocotirofomainquin naashquima. Nanri fopaiyaifoan min ato yoiyamaino nocotirofomaran ishon un ato tapimaita. Ascano uhuun caifofoan nannori nicacani machi mamaqui fotirofomaran, —ishon Moisés yoini.

²⁴Ascatan nocon Ifo Diosin cumani isca huaquin, —Natian fotohuu min ochi Aarón mi fu uqui onon. Ascafiacai ahuun yorafo cufinshomisifo yafi min caifo futsafo nuri futirofoma ua oinpai. Nuri fupaiyaifoan un ato namashquinran, —ishon nocon Ifo Diosin yoini.

²⁵Nannori nicatan Moisés machi mamaquinoashu fotonni nocon Ifo Diosin yoia cusca ahuun caifofo tapimaniyoi.

**Nocon Ifo Diosin Israelifo yonopaiyai
cuscan mucu rafuti ahuara
sharahuunoa ato tapimani**

20 ¹Nocon Ifo Diosin ato yoiquin isca huani,

²—Unfin maton Ifo Diosiquin. Man Egipciofoan ato yonomatifo ipaoni. Ascafiano un mato Egipcio mai arishon ihuua afanan aton yonomatifo man inonma.

³Nan yora futsa iyamarai ahuara futsafocai maton Diosin itiroma.

⁴Ahuara rami huayamacahuu “Uhuun diosiran” ishon yoiyamacahuun, Ascarafocai nocon diosima. Ahuara nai murannoa cuscarafocai rami huashon, “Uhuun diosiran,” iyamacahuu. Ahuara mai anoa cuscarafocai rami huashon, “Uhuun diosiran,” iyamacahuu. Ahuara unu murannoa cuscarafocai rami huashon, “Uhuun diosiran,” huayamacahuu.

⁵Nanscarafocai ratoconun mai chachishon cufinyamacahuun. Uncaifin maton Diosiquin. Urus fustifin un maton Ifoquin. Manfin uhuun yorafoquin. Ahuara

futsacai u fu maton diosi itiroma. Man futsa Ifohuapaiyaino man uhuun nomuran ua isinmatiro. Uncai ascarafocai tapipaima. Man futsa ifohuaiton un mato onaintimatiro. Tsoan ua noicasmay aa non ahuun facufi non ahuun chata yafi ahuun shotafo non aton facufi un ato onaintimatiro. ⁶Ascan tsoan ua noicoinfain un ato yonno cusca ai nan cuscarafocai un ato ismashquin un fasi atohuun noicoin. Ascashon ahuun funafori nantifi ahuun yorafo nan mai furoti nantishotapiquin un ato ismai un atohuun noiyai cusca.

⁷Uhuun anu ipaitsi yoiyamacahuun. Tsoan uhuun anuhunshon futsafo paranpai nan cuscarafocai un ato onaintimashquin.

⁸Uhuunno sabadotifi shinancahuun. Ua ointiaquimayamacahuun. Nan shafata uhuunno fusti man shinantiro. ⁹Ascano osha mucu fustiti non mucu foshca fusti man yonotiro. Ahuara man huapaiyai cusca man atiro. ¹⁰Ascafia osha septimo nan maton Ifo Diosi fustihuunno man shinantiro. Nan shafata afanan yonotamarocon tunucahuun maton Ifo Diosihuunno shinanyanan. Nan septimo osha maton facufi non maton yonomatifo nocofunifo non ainifo non maton inafocai non maton caifocai nan mato mai ano icafoanricai yonotirofoma. ¹¹Nanscarifi aqui maton Ifo Diosin osha mucu fustiti non mucu foshca fusti nai yafi nan nai muran

icafo oni huafain mai yafi na
mai ano icafo oni huafain
ununhuan non a muran icafori
onihuani. Ascano iyoconaino
afanan yonotamarocon maton
Ifo Diosin tununi. Ascashon
Diosin yoini tunutitian fasi
shara ahuunoa fusti man
shinantiroran ato huani.

¹²Maton upa yafi mato uhuari
nicasharafain ato
sharahuashofafaincahuun.
Atohuunoari shinansharafain
atohuunoa
yoisharapacucahuun. Man
ascaiton oinquin nan mai
nocon Ifo Diosin mato inain
man ano ipashquinon.

¹³Ascatan futsa rutuyamacahuu.

¹⁴Maton ahuinma fu iyamacahuu.
Ainfofoan mato funuma furi
iyamacahuu.

¹⁵Ahuara onuyamacahuu.

¹⁶Futsafahuunoa chani
yoyamacahuun.

¹⁷Futsan ahuun pushu
fianpaiyamafain ahuun ahuin
fianpaiyamafain ahuun
yonomati nocofunu
iyamaraiyainfo fianpaiyamafain
ahuun inafon nan moi non
burrofori fianpaiyamafain
ahuara futsafo futsafona
fipaiyamacahuun, —ishon Ifo
Diosin Israelifo yononi.

Israelifo Diosqui ratucoinnifo

¹⁸Diosin nannori ato yoiaino machi
ano fasi nai turuicain cana fasicoin
piishicaino nai murannoashu manuti
fasi achacoin icaino coinmanhuanun
machi fuponi. Nanscaiton oincani
Israelifo fasi ratucoincani. Tari tarinifo.
Machi chaimacai tsoa anima.

¹⁹Ascashon Moisés yoinifo isca huaquin,

—Nocon Ifo Diosin noco yoiyai cusca
minfin noco tapimatiro nan noco
yoiyaiyai cusca non ashonon. Ascan
nocon Ifo Diosi afin noco yoiaino non
nariscatiroran, —ishon Israelifoan
Moisés yoinifo.

²⁰Nannori yoiaino nicatan Moisés
ato cumani isca huaquin,

—Ratuyamacahuun. Diosin matoqui
oaquin man ahuun tsain nicacoinshon
man tapinon. Man aqui ratuai cusca
chaca huayamacahuun, —ishon Moisés
ato yoini.

²¹Ascano nan Israelifo machi chaima
shara niafoanno Diosi machi ano
faquishihuacoin huaino Moisés nanri
mapufaini Diosi fu tsainquin cai.

Moisés machi Sinain mamaqui mapufainni

24 ¹²Ascatan nocon Ifo Diosin
Moisés yoiquin isca huani,
—Machi mamaqui uqui mapunyohuu.
Un mia min caifofoya un yonoai cusca
mato toquiri sapa rafu cunushona cusca
man nicasharanon. Ascatan nan un mia
yoiaino min u fu nuno nituyotiroran,
—ishon Upa Diosin yoini.

¹³⁻¹⁴Nannori nicatan Moisés Israelifo
aton niaifo patasharinofo ichanan
huani ato yoishquin. —Unfin Josué fu
machi Sinain mamaqui mapuicaicain
nocon Ifo Diosin noco yoiyaiyai cusca
noco yoinon. Nunoshon noco
manayocahuu. Un nunomano ahuara
chaca finonshon Aarón iyamarai Hur
yoicahuun nan rafutan mato yoitiro
manmain ahuuscatiroquin, —ishon
Moisés ato yoini.

¹⁵Ascatan Moisés machi mamaqui
mapufainni. Ascaino nai
coinmanhuanun machi nantio fuponi.

¹⁶⁻¹⁸Nocon Ifo Diosicai tsoa futsa a
cuscarama nan fasi sharacoin fusti imisi.
Ascaino nantian nan machi Sinain ano

iyoni. Osha mucu fustiti non mucu foshca fusti nan nai coinmanhuanun machi fupocoinni. Ascatan iyoconaino nocon Ifo Diosin nan nai coinmanhuan muranshon Moisés cunani. Cunaino aqui machi mamaqui mapufainni Moisés arifi nai coinmanhuan muran iquicaini nocon Ifo Diosi nicashquin. Ascaiton Israelifoan oinnifo nocon Ifo Diosin sharacoin fusti. Nanno machi mamaqui chii urumanhuan nan mau cohui ointsacoin Israelifoan oinnifo. Ascano Moisés nan machi mamaqui coinmanhuan muran iquini. Nanno cuarenta dia oshani.

31 ¹⁸Ascano nan machi Sinain mamaquishon nocon Ifo Diosin Moisés tapimani cusca yoiqui anaitiano nan ato yononi cusca toquiri sapa rafuqui Diosin ahuun mutotinin ato cunushoni. Ascashon Moisés inanni ahuun caifo foshotanon.

Aarón moipan facu cahua shara ointsa rami huani Israelifo aton diosi inon

32 ¹Nantianri Israelifoan shinannifo fasi Moisés manariacaquin yoinifo isca huaquin, —Noncai tapiama ahuutiamain Moisés nocoqui nasoicai. Ahuara chacaraca finoan, —icashu Israelifo yoinannifo. Ascatan Aarón ano fonifo nan shinainfo cusca yoifocani. Ascashon yoiquin isca huanifo, —Moisés noco Egipcio mai arishon ihuufiashon noco potafainna. Ascacun noco diosi futsafo noco rami huashohuun nanfoan noco mai futsa ano iyoicanon, —ishon yoinifo.

²Nannori yoiiaifoan nicanan Aarón ato yoini isca huaquin, —Maton ahuinfo non maton furufo non maton ainfacufu yoitacahuun aton parotamutifo oro mato inainfo ua fushocahuun, —ishon Aarón ato yoini.

³Ascano nantifi Israelifoan aton parotamuti tsucashon Aarón fushonifo.

⁴Ascaiton nan parotamutifo Aarón fiini nan oro parotamutifohuunoa moipan facu cahua shara ointsa rami huani. Ascano rami huaquin anaititan Israelifo yoinifo isca huaquin, —Naafin nocon diosiquin noco Egipcio mai anoshon noco ihuuaran, —ishon aton caifo yoinifo.

⁵Nan ato yoi ai cusca nicacani Israelifo fasi unimacoinnifo. Ascashon Aarón oian nantifi yorafo fasi unimacani. Ascano moipan facu cahua shara ointsa aton ointaifin Aarón toquirifo putsainini nannoshon nocon Ifo Diosi cufinonfo. Ascatan ato yoini isca huaquin, —Funamari non nocon Ifo Diosi shinaintian non fusishquinran, —ishon Aarón ato yoini.

⁶Ascano iyoconaino funamarishta moinacahuan nan toquirifo putsamuinia camaquishon aton inafu rutushon coanifo. Asca huacatan shinainfo nocon Ifo Diosi atoqui unimatiro. Nan coaquin anaititan pifain aqui ayayanan paunyanan mononifo. Ascashon ahua chaca futsa futsatapafo huanifo.

⁷Ascashon nocon Ifo Diosin Moisés yoini isca huaquin, —Nuno machi mamaquinoashu cariscatahuun min yorafo nan min Egipcio mai anoshon ihuuafoan natian fasi chaca huacaniquin. ⁸Nan un ato yoi a cusca man samamashta potacoianfo. Ascashon moipan facu cahua shara ointsa rami huafo. Nan rami huafo ointaifin ratoconun mai chachishon a cufincani. Ascashon ahuun ointaifiri toquirifo putsamuinia camaquishon inafu rutushon coafo. Ascashon yoi afo isca huaquin, “Naafin noco diosiquin. Nantofin noco Egipcio mai anoshon ihuuaquin,” ishon yoi afo.

⁹Munfin oianquin na yorafo fasi yoitimacoinfo. Un ato yonoa cusca nicacasmamisifo. ¹⁰Ascacun ua

nituhuayamahuu. Natian un fasi atوقي sinacoin unfin ato namaquin futsashquicain. Ascano un mihuunshon mani futsafo ichapa sharafo un oni huashquiran, —ishon nocon Ifo Diosin Moisés yoini.

¹¹Nannori Upa Diosin yoiaiton nicaquin Moisés cumani isca huaquin, —Uhuun Ifon, min curushhuunshon min ahuamamishiti huatiro cusca na yorafo uhuun caifofo min ato Egipcio mai anoshon ihuua. Ascacun atوقي sinaquin ato cuyoyamapun. ¹²Min ato rutuaiton oinquin Egipciofoan yoishquin isca huaquin,

“¿Ahuuscai ato Ifo Diosin Israelifo machi ano ihuamun nannoshon ato rutuquin futsashquin?” ishon Egipciofoan yoishquicani. Ascacun uhuun Ifo ato rutuyamapun. Atohuunoa shinan futsapun ato rutushquima. Nan yorafohuunoa min shinain cusca afanan anori shinanyamapun. ¹³Min nocon shunifo Abraham non Isaac non Jacob yoiyoni cusca shinanhuun. Minhuunshon min ato yoini isca huaquin, “Un min funafo fasi ichapa rasi onihuashquin. Nan mai fasi sharacoin un ato inanshquin atona ipanon. Ascano min funafo fasi ichapacoin iishquin. Nan fishifo tsoancai ato tanan huatiroma. Nanscarifi ai min funafo chipo tsoancai ato tanan huashquinmaran,” ishon noco shunifo min ato yoini. Ascacun uhuun Ifo aton funafo cuyoyamapun, —ishon Moisés yoini.

¹⁴Nannori Moisés huaiton nicaquin nocon Ifo Diosin shinan futsani. Ascashocai Israelifo cuyonima. Nan ato yoia cusca ato rutuqui cuyopafiaquin.

¹⁵Ascatan Moisés nocon Ifo Diosi maquinoashu machi ariashu tununman fotopacuni. Upa Diosin ato yononi cusca toquiri sapa rafu ocuma rafu cunua.

Nan rafu tsomashu Moisés machi mamaquinoashu fotoni. ¹⁶Nocon Ifo Diosin nan toquiri sapa rafu oni hua. Ascashon Israelifo yonopaiyai cusca nan sapaqui cunushoni. Nantonri ahuun mutotinin toquiri sapa rafu camaqui cununi.

¹⁷Ascashon Josué fu Moisés na machi anoashu fotocaquin nicafo fasi mucacoinnifo. Ascashon Josué yoini, —iNicapon! Noco yorafo icanoashu fasi mucacani achacoin. Nan futsafoan ato rutui nicatsaran, —ishon yoiaiton.

¹⁸Ascaiton Moisés cumaquin isca huani,

—Ma. Nocon yora futsafo rutuqui shuhuian nicatsama. Mun nicai nan yorafo fanaincaniran, —ishon Moisés yoini.

¹⁹Nanscaifoan moi cahua shara oinfain monoaifoan oin Moisés fasi sinacoinquin toquiri sapa rafu machi tunanman potani. Potaino moshi futsuni. ²⁰Ascashon nan moi cahua shara ointsa rami huafori fifaintan chii muran potani. Chii muran potaino nantifi nan rami huafo chashcaiquin futsuni. Ascashon chipo chacachacaqui nantifi toyotoyo huani. Nan toyo huatan unuya osishon Moisés Israelifo ayamaquin yoini. —Nantifi nutsocahuun, —ato huani.

²¹Ascatan ahuun ochi Aarón yocani, —¿Ochin, na yorafoanmun mia ahuusca huacun min ato fasi chaca huamaicain? —ishon yocaiton. ²²Aarón cumani, —Ushton, shinayamapun. Man min tapián na nocon caifoan samamashta chaca huatirofo. ²³Nanfoan ua yoiäfo isca huaquin, “Nocon diosi noco rami huashohuun nunoshon noco iyoicanon. Na nocofunun Moisésuunoacai non tapiama. Noco Egipcio arishon ihuufiashon natianmun ahuuscaicain noncai tapiamaran,” ishon ua yoiäfo.

²⁴Ua nannori huaifoan un ato yoia,
 “Maton tuhuuti oro non maton
 parotamutifo non ahuara futsa oro man
 sahuuafu pucashon ua fushocahuun,”
 ishon un ato yoia. Ascashon ua
 inainfoan un chii muran potatanaino
 nan moi cahua shara niriscatanaran,
 —ishon Aarón ahuun ushto Moisés
 yoini.

²⁵Ascano Moisés oinni ahuun caifofo
 fasi mucayanar nocofunufori ainfofo fu
 ifiaifoancai ahuun ochi Aarón ato
 shatumanama. Ascaiton nan caifo
 futsafoan ato oinni cashu mutsamaifoan
 fasi atoqui shuchinifo. ²⁶Nanscaifoan
 shinanquin Moisés oi ashcafinin ahuun
 yorafo cunani.

—Nan ratorafu nocon Ifo Diosi fu
 rafupai uqui fucahuun, —ishon ato
 cunaino. Nan nicatan nantifi Levitafo
 aqui funifo. ²⁷Ascashon Moisés ato
 yoini, —Nonfin Israelifoquin nocon Ifo
 Diosin ua yoia isca huaquin, “Maton
 ashin nan yorafo ua chaca huaifo ato
 rututacahuun. Nan raniran icafoanno
 nantifi ato rutuqui futsashquin. Maton
 ochi non maton ushto non mato fu
 rafuafo non mato chaima icafori nan ua
 chaca huaifo ato rututacahuun,” ishon
 Diosin noco yonoaran, —ishon Moisés
 ato yoini.

²⁸Ascano nan Moisés ato yoia cusca
 Levitafoan huani. Nantian tres mil
 cuana nocofunufu rutunifo. ²⁹Ascatan
 Moisés Levitafo yoini,

—Uhuun yorafoan, nocon Ifo Diosin
 mato catoan mato yonopaiyai cusca
 man anon. Manfin nocon Ifo Diosin
 nicacoianquin. Maton facufo non maton
 yorafori mato yonoa cusca man ato
 rutua. Ascacun na shafata nocon Ifoan
 matohuunua shinanshararan, —ishon
 Moisés ato yoini.

³⁰Ascano iyoconaino Moisés ahuun
 caifo futsafo yoini isca huaquin,

—Uhuun yorafoan, man nocon Ifo
 Diosi fasi chaca huaifo. Ascafia un natian
 nocon Ifo cufin cai. Un mato
 cufinshonaino maton chaca nocon Ifo
 Diosi rau huatiroraca, —ishon ato yoini.

³¹Ascatan Moisés nocon Ifo cufinquin
 isca huani,

—Ohuashta, uhuun Ifon, na yorafoan
 mia fasi chaca hua. Ahuarafo oro rami
 huafo, “Nan nocon diosiran,” ishon
 yoiafo. ³²Ascafia un mia cufin, Ifon,
 aton chaca rau huapun. Min ato rau
 huayamaquin nan min libro mia
 tanamisifo min aton anu cunua mi fu
 ipamisifo muran uhuun anu nan libro
 murannoa soahuun, —huaiton.

³³Nannori Moisés yoifiaiton nocon Ifo
 Diosin cumani, —Tsoan ua chaca
 huacun nan ahuun anu uhuun libro
 murannoa un soashquin. ³⁴Natian un
 mia yoiai cusca mai futsa ano na yorafo
 iyotahuun. Nan uhuun oinmati u fu nai
 muran icaton mato rucu cashoi cai.
 Ascafia nan ua chaca huafo cuscaai un
 ointiaquimaima. Un ato chipo
 onaintimashquinran, —ishon nocon Ifo
 Diosin yoini.

³⁵Ascano chipo nocon Ifo Diosin ato
 pau isincoin fuchimani. Moi cahua
 shara ointsa Aarón rami huacun nocon
 diosiran ishon yoiaifoan. Nanscacun ato
 pau isininpacoin fuchimani.

Nocon Ifo Diosin ato yonoa cuscan Israelifo fonifo

33 ¹Ascashon nocon Ifo Diosin
 Moisés yoini isca huaquin,
 —Natian nunoshon ato iyotahuun. Min
 yorafo min Egipcio mai anoshon ihuua
 nan mai shara ano natian ato iyotahuun.
 Un min shunifo Abraham non Isaac non
 Jacob yoyiotiani cusca un ato funafo
 mai futsa fasi shara inain. Un ato yoini
 cuscaai uhuun tsain tsoan fiananan
 huatiroma. Nannori fusti. ²Unfin uhuun

oinmati u fu nai muran ica un mia nichishonicai mato rucu cashonon. Ascanofin nan mato noicasmaifo oin uhuun oinmatinin ato potaino nan mai un mato inain. Ascano Cananeofopotafain Amorreofopotafain Hititafo potafain Ferezeofopotafain Heveofopotafain Jebuseofopotashquin. ³Nan mai shara ahua ichapa ano fotocahuun. Ascafiacai un mato fu caima. Manfin ua nicacasmamisiquin. Nanscacun un mato fu caquin un mato rutuqui futsashquiraca, —ishon nocon Ifo Diosin ato yoini.

⁴⁻⁶Afanan nocon Ifo Diosin Moisés yoini, —Min yora Israelifo ua yoishohuun isca huaquin, “Manfin nicacasmamisifoquin. Un mato fu chaima shara caaquin un mato rutuqui futsashquiraca. Nanscacun maton tuhuuti non maton parotamutifo nanscarafo mato ahua pucacahuun un mato acai cusca un shinaintian,” ato yoihuun, —ishon nocon Ifo Diosin Moisés yoini. Nannori yoiaiton nicacani Israelifoan fasi shinancoinnifo. Ascano machi ahuan anu Horeb anoshocai aton tuhuuti non aton parotamutifo non nanscarafocai afanan sahuutama. Pucanifo.

Pano pushu ano Israelifo nocon Ifo Diosi fu ichanannifo

⁷Ascano Israelifo aton pano pushu icafo chaima shara pano pushu futsa Moisés nichini. Ascashon nan pano pushu anunifo isca huaquin, —Ichananti pano pushuran, —huanifo. Nan ratoran futsan nocon Ifo Diosi ahua yocapai aton pano pushu rasi anoashu nan ichananti pano pushu ano catiro ini. ⁸Moisés nan ichananti pano pushu muran iquiano ahuan caifofoan aton pano pushu caicainti anoshon oinnifo. Ascatan nantifi funinifoannifo Moisés

futan aton Ifo Dioshuunoa shinansharaquin ismashcaquin. ⁹Nan iquicaitan Moisés nocon Ifo Diosi fu tsaincaino nai coinmanhuan nan caincaiti ano amanaonri manipacufoantan nituni. ¹⁰Ascaiton oincani nantifi Israelifo aton pano pushufo aton caicainti ano nan niafoan arifi Diosi cufinnifo.

¹¹Ascatan pano pushu ichananti murannashu nocon Ifo Diosin Moisés fu yoinonanni. Nan a fu rafua fu yora tsaintiro cusca ai nocon Ifo Diosin Moisés fu tsainni. Tsainquin unutan Moisés afanan ahuan caifo icano nasoni. Ascano nan Moisés fu rafumisi Josué Nunpan facu nan ichananti pano pushu muran nituyoni.

Nocon Ifo Diosin afincoin ahua sharashacoin Moisés ismani

¹²Ascatan chipo Moisés nocon Ifo Diosi yoini isca huaquin, —Min ua yoimisi uhuun yorafo nan mai shara min noco yoiyoni min noco inainno ato iyotahuun ishon min ua yoimisi. Nannori min ua yoimisifiashocai ratofomun min uaya nichicain miancai yoimisima. Min ua onancoian uhuun anuhuunshon min ua cunamisi. Ascashon mian yoimisi isca huaquin, “Minfin ua tanasharamisiquin. Un miqui fasi unimairan,” ishon mian yoimisi. ¹³Ascacun min uqui unimaimainquin min ashquiai cusca ua tapimahuun un mia onancoinfain min ua amapaiyai cusca un mia ashonon. Ifon, ointiaquimayamapun uhuun caifofin min yoracoinfoquin, —ishon Moisés yoini.

¹⁴Nannori huaiton nicaquin nocon Ifo Diosin Moisés cumani isca huaquin, —Min yorafo mai futsa ano iyoaitian un mi fu caashquin. Unfin mia cushusharaicai min nomuran min

shinanchacanonma, —ishon nocon Ifo Diosin Moisés cumani.

¹⁵Ascatai Moisés yoini, —Min no fu caimanmainquin nunoshon noco nichiyamahuun. ¹⁶¿Min no fu cayamaino ahuuscashomun yora futsafoan tapitiromun min ua non uhuun caifofoqui unimai? ¿Min no fu cayamaino ahuuscashomun futsafoan tapitiroquin noncai caifo futsafo cuscarama? ¿Ahuuscashomun tapitirofoquin ua non uhuun caifofo min noco catoan min yoracoinfo non inon? —ishon Moisés yoini.

¹⁷Ascaiton nocon Ifo Diosin Moisés cumani isca huaquin, —Minfin u fu rafumisiquin. Un miqui unimacoinni. Nanscacufin mian yoiai cusca icon un mia ashoicain, —ishon yoini.

**Israeliffoan faritifi aton fuyamisi Diosin
ato sharahua cuscan fuusinifo**

¹⁸Ascano Moisés afanan nocon Ifo Diosi cufini isca huaquin, —Uhuun Ifon, min sharacoin un mia oinpaiai cusca ua ismapun, —ishon cufini.

¹⁹Nannori cufiainton nicaquin nocon Ifo Diosin Moisés cumani, —Un fasi sharacoinshon un mia finonmani. Un mia finonmanaitian uhuun anu un mia yoi. Nan un ato catoanfofin un ato shinaincai. Ascashon un ato shara huatiro. Nanscarifiaquin nan un atohuun ramapaiyaifin un atohuun ramapaitiroquin. ²⁰Ascafiacai uhuun fusocoin min ointiroma. Tsoancai ua ointiroma. Ua infin yora nariscatiroquin.

²¹Nuno na toquirininhuan camaqui nihuun. Un mia chaima nia. ²²Un fasi sharacoin cusca un mia finoincai. Nantian un na toquirininhuan cashcua ano un mia finonquin. Un mia nan toquiri cashcua muran iquimayoi. Ascashon uhuun mucuman un mia

fupoyoi. ²³Ascano nan uhuun mucu un finifoannaitian min uhuun puchi fusti oinshquin. Ascafia mincai uhuun fuso ointiromaran, —ishon Ifo Diosin Moisés yoini.

**Afanan nocon Ifo Diosin Israelifo yononi
cuscan toquiri sapa rafuqui ato cunushoni**

34 ¹Ascatan nocon Ifo Diosin Moisés yononi isca huaquin, —Na toquiri sapa rafu min moshaita cuscaran afanan nanscara rafu fihuun. Nan un mato cunushonita cuscaran nanscara tsainri un afanan mato cunushonon. ²Ascatan funamarishta itisharahuun nan machi Sinain mamaqui afanan uqui mapuyoshquin. ³Min nuri uqui oainocai mi fu tsoa otiroma. Nan machi tunanmanricai tsoa otiroma. Inafoanricai nan fasi funununshon nanno pitirofomaran, —ishon yoini.

⁴Nannori nicatan nocon Ifo Diosin yoia cusca Moisés huashoni. Nan toquiri sapa rafu Diosin inainta cuscara rafuri Moisés toquiri sapa rafu fini. Ascatan funamarishta nan toquiri sapa rafuyashon machi Sinain mamaqui mapufaini. ⁵Ascano nocon Ifo Diosin nan coinmanhuan muran Moisésqui fotoaitian ahuun anu yoini. —Uhuun anufin mato Ifoquin, —ishon yoini. Nan nocon Ifo Diosin icano Moisés a fu nia ini. ⁶Diosin Moisés finonfoanquin yoini isca huaquin,

—Unfin mato Ifoquin. Un matohuun ramapaicain un mato shara huamisi. Uncai matoqui funa sinatiroma. Un mato noia cuscacai un unupacunacama. Nan un mato yoiai cuscafin un nanscacoimnisiquin. Uncai mato parapacunacama. ⁷Unfin yorahuan rasi ato ismamisiquin un ato noiai cuscacai unupacunacama. Nan yorafoan chaca futsa futsatapafo huafain un ato yonoa

cusca ua nicacasmamisifofia un ato rauhuashocai afanan aton chaca un shinainma. Un ato rauhuafia aton chaca shatuyamaifoan un ato onaintimai. Ua chaca huaifoan unfin atohuunshon aton facufo non aton chatafo non aton shotafu yafi ahuun facufori un ato onaintimairan, —ishon nocon Ifo Diosin Moisés yoini.

⁸Nannori huaiton nicai Moisés maiqui fuopacuni nocon Ifo Diosi ismashquin nan ahuun noiai cusca nan nicasharapaicoi.

⁹Ascashon Moisés yoini isca huaquin, —Uhuun Ifon, min uqui unimacoinmainquin no fu capun. Nan uhuun caifoan mia nicacasmafain aton chaca shatucasmafain non mia nicacasmafia noco rauhuafain non mia chaca hua cuscari noco rau huapun. Min yoracoinfo noco imapun, —ishon Moisés nocon Ifo Diosi nannori yoini.

**Afanan nocon Ifo Diosin Israelifo ashoai
cusca Moisés tapimani**

¹⁰Nan Moisés cufiain cusca nicaquin nocon Ifo Diosin cumani isca huaquin, —Un mato yoiyai cusca man aiton un mato cushusharafafainshquin. Un min caifoan aton ointaifin un ahuamamishti huashoshquin. Un mato ashoai cuscacai mani futsafoan oinmisifoma. Un mia ashoai cusca mi fu icafoan oincaquin tapitirofo unfin ahuamamishti sharacoinfo huatiroquin.

¹¹Un natian mato yonoai cusca man aiton nan mato noicasmaifo Amorreofo non Cananeofo non Hititafo non Ferezeofo non Heveofo non Jebuseofo un ato potano nan mai un mato inanshquin nanfocai afanan nanno itirofoma.

¹²Nan caifo futsafo fu yoinonain iscayamacahuun, “Man no fu isharaiton norifin non mato fu isharatiroquin,”

ishon nannori ato fu yoinonanyamacahuun. Man ato fu nannori yoinonainton mato fasi fucash huafain mato chaca huatirofo. ¹³Ato fu yoinonantamarocon aton toquirifo nan putsainiafo aton dioscoinfoma nanfo cufinshquin oni huafo ato nantifi chacanan huancahuun nantifi potaquin arasaqui futsacahuun. Nan rami huashon noco Diosinran, ishon yoisififo nanfori potacahuun arasaqui futsunon.

¹⁴Urus fustifin un mato Ifo Diosiquin. Ua fusti noifain ua fusti cufincahuun. Ua man noiai cusca ahuara futsafo noiyamafain nanfori cufinyamacahuun. Unfin mato fu rafuaquin maton Ifo fusti iishquin. Uhuun anufin mato Ifo Dios fustiquin. Tsoa futsacai u fu maton ifo itiroma. Ahuara futsa man ifohuapayaiton nanscarafo cufinquin man uhuun ointi isinmatiroran, —ishon nocon Ifo Diosin yoini.

**Nocon Ifo Diosin Israelifo yononi
cuscan Moisés cununi**

²⁷Ascashon tsainqui unutan nocon Ifo Diosin afanan Moisés yoini isca huaquin, —Un mia non min caifo Israelifo yononi cusca ua man nicasharaino un maton Upa ishqui. Nanscashofin un mato cushusharapacunacaquin. Nannori cunuhuu, —ishon Upa Diosin Moisés yononi.

²⁸Nocon Ifo Diosin yonoai cusca Moisés huashoni. Nantiari a fu ini. Cuarenta dia cai ahuashta piyamafain unuricai ayanima. Nocon Ifo Diosin ato yononi cusca nan toquiri sapa rafuqui Moisés cunushoni. Mucu rafuti ahuara sharahuunoa Ifo Diosin Israelifo yononi cusca nanfo cununi.

²⁹Ascatan cunuquin anaitishoano Moisés machi Sinain mamaquinoashu

fotoni nan toquiri sapa rafuqui Diosin ato yononi cusca tsomashu. Nan fotoquicai Moisés tapinima nocon Ifo Dios fu tsaincaitian ahuun fuso fasi chashani. ³⁰Ascano Aarón yafi Israelifo icano Moisés nocoaiton oianfo ahuun fuso fasi chashacoiaiton oincani fasi aqui ratucoinnifo. Moisés chaimacai Israelifo aqui funifoma fasi ratucani.

³¹Ascatan Moisés Israelifo ato cunani, —Uqui fucahuun un mato yoinon, —ishon ato cunaino aqui fonifo.

³²Ascano nantifi Israelifo aqui fonifo machi Sinain mamaquishon nocon Ifo Diosin yononi cusca nantifi Moisés ato yoipacuni. ³³Ato yoiqui unutan Moisés fufopomuni.

³⁴Ascatan afanan nocon Ifo Dios icari caquin Moisés ahuun fufopomuti shorini nan Israelifoqui nasoi chain. Ascatan afanan chipo atoqui nasoni nan nocon Ifo Diosin yononi cusca ato yoipacuni. ³⁵Nan ato yoiaiton oianfo ahuun fuso afanan chashacoin ini. Nantian Moisés afanan fufopomuni. Ascano Moiséscai nan nocon Ifo Diosi fu tsainquicai fufopomunima.

39 ⁴²Nan nocon Ifo Diosin Moisés yononi cusca Israelifoan nantififain ashonifo. Upa Dios fu tsainti nan pano pushu non ahuara futsa ato yonoa nantififain ashonifo. ⁴³Nan aton yonoquin anaitishon Moisés oinnisharamainquin. Ascatare oinni

Diosin ato yononi cusca nantififain shara huashonifo. Ascashon ato yoini, —Aicho. Nocon Ifo Diosin yononi cusca man nanscacoín huashoanquin. Nocon Ifoanfin mato shara huashquiquin, —ishon Moisés ato yoini.

Pano pushu ichananti manaon nai coinmanhuan manipacufoan nituni

40 ³⁴Ascatan nai coinmanhuanun ichananti pano pushu manaon

fuponi. Nantianri nocon Ifo Diosin ahuara fasi sharashtacoin ascaracai tsoan oinyomisima cuscara huaní. Ascatan pano pushu muran iquicaini.

³⁵Nan nai coinmanhuanun pano pushu fupoano nan muran Ifo Dios nan fasi

sharacoin iquiaitiancai Moisés pano pushu muran iquitiro inima. ³⁶Ascano chipo nai coinmanhuan nan ichananti pano pushu amanaonrinoashu

shucuinacahuanano nantianri Israelifo ato pano pushu anoashu fonifo. ³⁷Nan nai coinmanhuan caiyamainori

Israelifori nituyoni. Ascano nan nai coinmanhuan caitian Israelifori fonifo.

³⁸Ascano shafatan pano pushu manaon nai coinmanhuan nituyoni. Ascatan nan yamu nai coinmanhuan muran aton Ifo Diosin ato chihuan urumanhuan huashoaiton Israelifoan oinnifo. Nan Israelifo foafafainafotian ato nanscashopaoni.